

東  
華  
續  
錄

東華續錄

咸豐八十

臣王先謙敬編

臣陶澐宣恭校

五月乙亥朔諭內閣譚廷襄奏遵查失事總兵各員一摺署天津鎮總兵副將達年督同署副將德魁駐守礮臺不能督率兵勇認真抵禦以致礮臺失陷實屬畏葸無能達年德魁均著革職拏問交譚廷襄嚴行審訊按律懲辦已革提督張殿元如何失事都司訥勒和尙無下落著譚廷襄一併查明具奏○丙子諭內閣官文奏皖賊竄入黃安攻剿獲勝一摺皖省賊匪由河南光山等處竄入黃安李續賓隨同舒保帶領兵勇前往援應賊眾蠶擁來撲官軍齊出奮擊斬馘二百餘名舒保督同副將趙克彰等分路鈔擊賊眾大敗官軍追至城下踰毀賊壘五座斬擒無算著卽督飭將

弁迅速進攻克復城池毋稍遲緩○諭軍機大臣等前因朱鳳標等奏浙省軍情緊急請飭李續賓到任辦理軍務當經諭令官文等將皖北一路事宜另籌派員接辦卽飭李續賓帶所部精兵赴浙本日據官文等奏賊竄黃安撥兵援剿獲勝一摺楚北麻城尙未合圍黃安又陷李續賓一軍見已取道黃陂會同舒保夾攻擬收復黃安後併力麻城再行分撥肅清皖豫惟浙省自處州失陷後賊勢日熾上游各府悉行震動福興一軍專顧衢州周天受明安泰兩軍力扼金華兵力尙覺單薄浙省軍情更屬緊迫著官文等酌量情形通籌大局如黃安麻城楚省兵力足敷剿辦卽仍遵前旨迅飭李續賓簡帶所部精兵馳赴浙江以資援剿將此由六百里諭令知之○諭樂斌奏縷陳番務情形請飭西甯辦事大臣等詳查籌辦一摺甘肅西甯口外野番爲患樂斌到任以後派令

署西甯府知府那遜阿古拉派兵剿捕隨有剛咱等族野番情願投誠求將河北地方賞給住牧保護蒙古邊民各旗蒙古亦願將青海迤南戈壁地方暫行借給住牧似此權宜辦理原期相安無事惟野番貪殘成性移至河北後或不免欺凌蒙古滋生事端更恐河南各番相率效尤懇求遷徙自宜慎之於始以安蒙古生計此事著樂斌督辦卽不能親身前往務須派委明幹大員隨同圖伽布督飭西甯鎮道確切查明通盤籌畫應如何定立界址設法鈐束以杜侵越及不准再有番族過河以期日久相安之處妥議章程具奏不得遷就目前致滋後患將此諭令知之○丁丑諭軍機大臣等勝保袁甲三奏追剿餘匪暫駐正陽控扼一摺前因徐宿愼勢披猖諭令袁甲三馳往剿辦並因清流關爲南北咽喉諭令勝保添撥兵勇由臨淮進扼滁州後路茲據該副都統等奏袁

甲三俟南路大局稍定卽赴徐宿勝保暫駐正陽控制長淮等語  
見在六安餘匪繞道東趨擄掠鹽船竄赴懷遠已有穆騰額前往  
追剿當能盡數殲除勝保務當南堵逆黨北絕捻蹤毋令互相勾  
結仍須察看何路喫重卽往剿辦其清流一路亦須設法策應至  
徐宿爲北竄要衝袁甲三仍遵前旨卽帶兵勇前進以顧北路徐  
州兵力甚單袁甲三所統馬隊及自練馬勇不敷調撥德楞額見  
有馬隊數百名在陳防堵俟袁甲三赴徐時卽可調兵應用其勝  
保軍營之陝甘兵一千名能交袁甲三帶往徐州則兵力較厚該  
處賊氛甚熾深恐闖入山東境內須及早撲滅或偁令南趨方爲  
穩妥將此由六百里諭令知之○戊寅諭內閣福濟等奏擊退臨  
淮捻賊協同克復六安來安並擒匪竄撲懷遠見籌堵剿一摺安  
徽粵捻各匪竄撲桃鎮經鄭魁士會同舒城縣知縣甘文瀾等克

復該逆敗回六安復經知州茅念劬等會合攻擊克復州城見復  
竄陷懷遠著卽飭帶兵司道聯絡紳團勦捕毋令蔓延○諭軍機  
大臣等福濟等奏擊退臨淮桃鎮捻賊協同克復六安來安並捻  
匪撲陷懷遠一摺該撫身任地方督辦軍務未可以北竄要路全  
委他人本日復據和春奏請飭鄭魁士迅回江南軍營等語德安  
早已抵皖見在江南帶兵大員明安泰等先後赴浙援勦著鄭魁  
士卽日馳赴江南軍營聽候調遣毋稍遲延將此由六百里諭令  
知之○諭據福濟奏飭撥皖餉均屬無著並兩淮截畱抵餉又劃  
解南河鈔本請旨飭催趕解等語見在粵捻各匪竄擾廬州官軍  
分投勦辦餉項必須應手著何桂清崇恩恆福曾望顏各將應解  
之款按月如數撥解其兩淮截畱撥抵陝西欠皖協餉及淮南徵  
課並著庚長飭令全數解廬毋庸劃解南河鈔本其四川月撥李

孟羣一軍三萬兩及河南省協款亦著王慶雲瑛榮源源籌解以重軍需將此由五百里各諭令知之○諭前因耆英素悉夷情特降旨發去欽差關防與桂良花沙納公同接受一體鈐用茲據桂良等奏耆英自到津後英佛不與相見深懷疑貳請飭回京等語耆英係原定和約之人於一切情形素所深悉經朕此次棄瑕錄用畀以欽差重任專辦夷務已有旨毋庸事事會同桂良等辦理至各條定議准駁總期於中國無礙者酌量允行桂良等雖同是欽差未若耆英熟悉何以忽有代奏回京之請耆英並未列銜是何意見究竟此事耆英若何辦理著卽通籌具奏○諭前因俄夷於地界一節諭知奕山與木哩斐岳幅會勘時查照從前界碑與之剖辯不可遷就了事茲據該將軍奏會晤夷酋酌議地界所請黑龍江左岸舊居屯戶之外所餘空曠地方給與存居並江中准

其行走等情奕山因與屯戶生計尙無妨礙業已悉行允許自係從權辦理惟該處既給與俄夷又恐民夷雜處致滋事端奕山當妥爲彈壓毋稍大意其松花江烏蘇里綏芬等河界屬吉林距興安嶺遠近夾山不能懸揣卽著景瀄迅速查明如亦係空曠地方自可與黑龍江一律辦理儻該處本有居人一旦爲夷占踞與我國屯丁耕作均有妨礙景瀄當咨明奕山據理剖辯不可一概允許又滋後患至所請於黑龍江通商之事卽著奕山體察情形妥籌條約一面仍嚴密防範設法駕馭○諭前據羅惇衍等奏進紮花縣激勵紳團密籌克復省城並片陳江國霖等媚夷各情均經諭令黃宗漢與該侍郎等密商舉動並將該藩司等懲辦計該大臣當已行抵粵省所有調兵集餉輯民攘夷各事宜想能遵照諭旨妥爲辦理廣東文武各官受夷挾制殊堪痛恨本擬俟黃宗漢



查參懲辦乃本日據江國霖奏竟以籌剿西江軍務爲名擅自出省該藩司於夷人入城失去庫項咎已難辭復敢抽身遠出更出情理之外已降旨將江國霖革職交黃宗漢審訊其廣東布政使著畢承昭補授畢承昭本係黃宗漢隨帶之員見已擢任藩司籌備餉需各事卽著責成督辦江國霖素性貪巧曾據羅惇衍等參奏首鼠兩端每月朔日率各官與夷人會面受其約束曾到花縣求緩攻城並有恐獲罪於夷不回省城等語此次藉詞剿匪居心已可概見黃宗漢務當嚴切審訊毋令遁飾其前論撤參之署臬司蔡振武及拏問之革道俞文詔並著按照所參嚴辦撫局未易定議廣東團練見辦情形若何著該督隨時馳奏以慰廑念○桂良等奏領到關防並陳見辦情形將內地通商游歷各省兩節允俟軍務完竣後酌辦兵費推交廣東進京約俟再議奏入 上貴

其輕爲許諾必貽後患惟當將添口減稅各條再行酌辦並命曉諭俄國公使說合轉圜○以託詞剿賊出省革江國霖職交黃宗漢審訊以畢承昭爲廣東布政使前安徽布政使○加展五城煮賑三箇月○己卯內閣欽奉、硃諭耆英經朕棄瑕錄用委任辦理夷務乃畏憚無能大局未定不候旨擅自回京不惟孤負朕恩亦無顏以對天下實屬自速其死著僧格林沁派員將耆英鎖扭押解來京交巡防王大臣軍機大臣會同宗人府刑部嚴訊具奏此次朕用耆英原出於不得已冀其有成雖經惠親王等保奏實係操縱自朕無先見之明愧恧殊深惟王等襄贊無方若不予以薄懲曷以洽服眾議惠親王著毋庸管理中正殿 雍和宮事務載垣端華均著開領侍衛內大臣缺與惠親王一併交宗人府議處彭蘊章柏葰穆蔭杜翰均著交部議處○諭軍機大臣等據惠親王等

參奏耆英擅自回京並呈遞信函覽奏實堪詫異耆英本係獲罪之員前因惠親王等奏請派赴天津辦理夷務朕念伊尙悉夷情寬其既往棄瑕錄用令與桂良花沙納妥籌商辦伊應感發天良力圖報效昨桂良花沙納代伊奏請回京未嘗允准乃竟不候諭旨先自由津回至通州閱伊所致僧格林沁信函畏葸無能不顧大局置身事外殊深痛恨已有殊諭令僧格林沁派員將耆英鎖扭押解來京交巡防王大臣等嚴訊矣該大臣接奉此旨務將耆英派員押解啟程見在撫局未定自應先機籌備防剿之策方不至倉卒失據該大臣駐紮通州距津甚近務當隨時偵探作速布置至駐紮山海關之察哈爾兵一千名本日已諭令前赴通州並諭慶祺迅調盛京兵一千名飭交玉明統帶往山海關防堵以臻嚴密○庚辰湖南巡撫駱秉章奏憑陳籌餉情形一在釐剔錢糧

宿弊以恤農而輸將較前踴躍一在杜絕釐金擾累以通商而抽收較爲實際得旨汝久任封疆所陳皆歷練有據之論洵非以耳爲目者比○辛巳諭軍機大臣等僧格林沁奏遵籌布置各情形一摺所籌挑挖引河修城安礮宣化綏遠密雲等兵分駐運河東西兩岸及采育等處一切布置均屬周妥其遵議酌增兵丁口分章程卽著照所議辦理托明阿統帶官兵駐紮楊村聞珠勒亨一軍獨駐河東恐非要地應移紮何處與各軍聯絡著僧格林沁體察情形妥爲調度不可以有用之兵置之無用之地所請飭各部院堂官派員赴各州縣辦理團練事宜已諭巡防王大臣行知各衙門辦理矣將此諭令知之○添派禮部尙書瑞麟辦理巡防事宜○壬午予廣西殉難道員孫蒙等祭葬世職○癸未 上還宮○諭軍機大臣等前因浙省軍情緊急諭令官文等卽飭李續賓

迅速赴浙茲據該大臣等奏稱自黃安失守德安安陸襄陽各郡縣均已戒嚴李續賓於九江克復之後督兵上援黃安俟賊匪撲滅再當圍剿麻城皖省賊勢已並趨英霍宿太等處應以都興阿李續賓節節掃蕩若令該藩司赴浙則楚皖三省空虛等語所奏自係實在情形浙江處州被陷各隘均屬喫緊先後由和春等派總兵周天受明安泰周天培等馳往援剿並令和春督辦江浙兩省軍務前赴浙江統率諸軍該省兵力已厚諒可無虞竄突李續賓見在黃安剿賊卽著毋庸赴浙該大臣等以皖省形勢爲賊所必爭擬各路肅清以全力注於皖北係爲通籌全局起見著官文都興阿胡林翼卽相度機宜妥籌辦理可也將此由六百里諭令知之○諭寄諭密雲副都統勝保等伊興額史榮椿奏追剿捻匪直至蒙城見仍回顧宿徐請催援軍一摺此次捻匪由六安逃出

攻陷懷遠圍及蒙城伊興額等孤軍不能解圍且自宿州澮河以南至臨淮以北徧地賊圩聚黨數十餘萬之多勝保堵遏南路而賊勢已悉眾北趨徐徇爲緊要門戶雖前據和春等奏已調傳振邦帶兵一千餘名計日當可馳至兵力尙嫌單弱屢經諭令袁甲三帶兵勇前進以顧北路並諭勝保將陝甘兵一千名交袁甲三帶往徐州見在賊燄甚張著卽飛速拔隊啟程毋再延誤勝保暫駐正陽卽可爲袁甲三後路策應至山東省金鄉單縣賊蹤已遁所有嶧邳等處防兵仍著崇恩飭將弁管帶出境交伊興額等調遣將此由六百里各諭令知之○諭前因江西需餉甚殷經部議准於山西陝西二省每月各先儘協撥餉銀三萬兩以資接濟茲據耆齡奏疊次咨催僅據山西省解到銀一萬六千餘兩陝西省解到銀二萬兩請飭催趕解等語見在江西軍務日有起色餉項

如能應手即可迅就肅清著恆福曾望顏各將應解協餉銀三萬按月如數撥解以濟要需將此由五百里各諭令知之○甲申諭軍機大臣等桂良花沙納奏英夷將次就範見擬從權辦理一摺所求各條種種皆貽後患如內地通商一節原議軍務完竣再辦而該夷卽欲於鎮江先立馬頭可明白曉諭告以鎮江連年皆遭兵火民情尙未安帖亦無殷實商人在彼若驟立馬頭置棧積貨不但不能銷售且難保無爭奪口舌之事設或彼此不能相安轉致有傷和好是以必須軍務完竣方可定議並非託故遲延又如遊歷各省州縣一節雖議明持照前往儻與民人口角鬪毆或迷失傷亡中國地廣人多不能查察須先與之言明方免日後又費脣舌至進京一節他國所議但言有事進京而英夷必欲在京久駐且自居欽差名目其窒礙之處尤不勝言當告以有事進京旣

經允許則遇有大事儘可來京面訴何必畱人遠駐京師若必欲駐京則俄夷成例具在但能派學生畱駐不能有欽差名目須改中國衣冠聽中國約束專令學習技藝不得與聞公事於爾國亦無大益況各國通商各有督撫嗣後若有要事不拘何處皆可由本省督撫代爲轉奏不必向廣東欽差理論自不至有蒙蔽之處卽與駐京同其便捷以上各層均可聽其自擇桂良等無論如何爲難必須將此事阻止俄夷旣感激出力卽與之言爾國多年和好尙止學生在京從無欽差駐京之事今英夷先議入城豈不轉在俄國之上託其從中設法卽不能罷進京之議亦須俟廣東事了再行詳細議定如何禮節彼此允協方能定約至將來定議進京亦止能自上海起由內地北來中國派官護送一切供應俱由中國辦理不必令其自備資斧以後或三年一次或五年一次來



京不必年年跋涉其先來京城看定寓所及在天津租賃房屋之處俱毋庸議俄夷欲送槍礮既出真心可告以送來之時必當收受將來亦必以禮相酬其欲令人來教導技藝矚看礦苗均著婉言回覆爲要○乙酉巡防大臣惠親王等奏連日審訊耆英供稱英夷包藏禍心恐害撫局並有面陳事件是以於桂良花沙納代爲具奏後卽行進京並呈耆英親供三件得旨著恭親王奕訢惇郡王奕誼會同大學士六部九卿秉公定擬具奏耆英所具供並摺發交爾等同閱○丙戌 上幸圓明園○諭軍機大臣等桂良花沙納奏議論條約情形一摺佛夷所求內江通商一節該大臣等已許南京一處見在逆匪占踞金陵官軍克復之後地方凋敝一切善後事宜非兩三年不能妥辦須俟辦妥後方能議立馬頭該大臣等務當明白開導以免臨時饒舌內地遊行一節無非慮

在傳教但中國民情不一肯否習教不能相強儻將傳教之人暗中殘害或迷失傷亡中國地廣人眾不能紛紛代爲查辦此層須先爲說定至派員進京看定房屋畱數人居住辦事一條該夷畱人在京無事可辦海口通商事宜仍須由各督撫察看地勢民情京中礙難懸斷若照俄夷成例其隨從人等須改中國衣冠遵中國制度不得與聞公事有何裨益仍須詳言阻止方爲妥善其賠償兵費數目至二百萬雖屬無理原不足計較惟廣東關稅五年之中能否扣出此數況尙有英米二國恐爲數不敷必須俟廣東大局定後方能覈算該大臣等須示以誠信以見不輕定約爲定約後事必能行其尙無把握者不敢漫然應允並非推諉也○丁亥諭軍機大臣等本日據英桂瑛榮奏亳州剿捻獲勝豫省兵難抽撥並據福濟德安奏臨淮猝陷通籌大局各一摺前因徐宿喫

緊疊諭袁甲三迅速帶兵前往見在豐沛蕭碭屬境股匪亦退徐郡情形較前稍鬆而臨淮爲南北要衝被賊失陷不但南達滁全恐捻匪與粵逆勾結卽清江盱眙沿湖一帶均已逼近勝保等克復六安後卽宜分兵兼顧各路此時袁甲三毋庸赴徐著督帶兵勇馳赴臨淮等處扼截並著勝保察看何處賊情緊急卽往何路攻剿福濟請飭李續賓統兵繞赴舒廬都興阿楊載福督帶水師由南而北等語九江見雖克復李續賓因湖北黃安麻城告警尙須移師節節往剿未能他調都興阿等亦須畱剿宿太等處不能徑赴皖北福濟已派勇馳赴定遠並由德安抽兵五千名交總兵塔思哈帶往著卽責令相機扼剿勿使臨淮之匪與滁賊勾通以護餉道仍不得專恃援兵毫無布置致干咎戾至徐州匪蹤業已肅清而懷蒙賊氛未挫日內傳振邦諒已到徐卽著與伊興額史

榮椿督兵進剿並與袁甲三併力夾攻以期盡殲醜類並著英桂  
瑛榮飭令德榜額朱連泰兩軍由鹿邑亳州確探賊蹤以剿爲防  
不得株守一隅致有貽誤將此由六百里各諭令知之○戊子諭  
內閣大學士公裕誠植品醇正辦事勤能器量淵深老成練達由  
監生侍衛嘉慶年間卽在乾清門行走疊蒙 皇考宣宗成皇帝  
擢至正卿供職內廷緣事降調復任都統將軍朕御極之初內用  
尙書晉秩綸扉仍兼總管內務府大臣管理部院旗營事務數歷  
中外懋著勤勞前以微疴給假調治方冀漸次就痊正資倚畀茲  
聞在園寓溘逝悼惜殊深著賞給陀羅經被派恭親王奕訢帶領  
侍衛十員卽日前往奠醊加恩晉贈太保照大學士例賜卹准其  
入城治喪並賞給銀一千兩由內交出本月二十二日朕親臨賜  
奠任內一切處分悉予開復應得卹典該衙門察例具奏用示朕

眷念耆臣至意尋于祭葬諡文端○己丑諭軍機大臣等和春奏遵旨赴浙江督辦及見在患病等語浙江軍務緊要亟須和春前往督辦惟據奏見在患病急切竟難就道自應安心調理一俟病痊卽馳赴浙江妥爲調度該大臣見已傳檄浙江卽日前往督剿有此先聲賊勢或可稍戢周天受擬先剿永康武義追出縉雲仍扼桃花嶺險隘以固金紹之防布置尙爲妥協著卽督飭該總兵迅速籌辦李續賓見因黃安麻城告警未能赴浙李定太李元度兩軍由江西進剿卽可與周天受聲勢聯絡爲兩路夾攻之計該大臣病痊赴浙時金陵圍剿事宜卽交張國樑一手經理迅圖克復江南大營兵勇多調往他處見募新勇八千餘人但未經戰陣恐糜餉無益兼恐有來歷不明之人混迹其中務須慎加查察爲要鄭魁士前已諭福濟等令其馳赴江南矣將此由六百里諭令

知之○諭德興阿等奏浦營等處各路布置情形並全滁逆眾糾合捻匪急圖攻剿一摺據稱九洲洲一帶近日爲水所阻洲賊堅閉不出我軍亦不能前往惟賊匪曾駕小船前來窺探仍當派兵堵截加意慎防以便相機渡剿其石磧橋嚴防西路並小店一軍扼要控守及防堵滁賊竄突情形布置均尙周密至捻眾由含山懷遠分竄全椒滁州勢甚猖獗亟應連兵合剿廬營兵單不敷分撥本日已諭勝保酌量情形調兵會剿但臨淮懷遠尙勞兵力能否卽赴全滁尙難豫料德興阿等仍當撥兵兼顧方爲妥善儻六合一帶告警卽著翁同書帶兵堵剿毋令逆匪內竄將此由六百里諭令知之○諭勝保袁甲三奏通籌南北各路軍情一摺並片陳李兆受納款輸誠擬親往受降圖復舒桐請旨遵行等語勝保擬以大軍屯駐正陽以精兵間道進擣舒桐兼籌力扼臨淮但臨

淮關已報失陷而英桂等奏徐州見無賊蹤是以十三日寄諭令袁甲三毋庸赴徐改赴臨淮截剿並令勝保察看賊勢何路緊急卽往何路攻剿此時臨淮懷遠相繼失守勝保自應先剿北路暫緩南征袁甲三當已卽赴臨淮勝保亦應親統各軍或會剿臨淮或北攻懷遠與袁甲三之師相爲策應徐州見無賊蹤則伊興額史榮椿所帶各軍亦可酌量調度併力兜擊本日據德興阿等奏全滁賊匪勢甚猖獗皖省兵單不敷調撥德興阿等自攻克來安後已分兵駐守來安兵力亦難再分全滁爲北路藩籬勝保督辦三省剿匪事務並著統籌全局應調何路兵勇會攻全滁其先後緩急著斟酌辦理其正陽要隘仍須畱兵防守毋令再爲賊擾至逆首李兆受黨與甚多受降未必可恃如果出於真誠著勝保卽飭令攻取舒桐以立功給獎舒桐機會固不可失而南北輕重亦

要權衡諒勝保等必能迅籌妥辦以副委任將此由六百里諭令知之○諭前因夷船駛入天津海口當令崇恩飭沿海文武查有海運米船北駛者輒入偏僻海口停泊相機妥辦茲據崇恩奏請將海運漕糧改歸奉天籌辦並請飭籌漕米在船停泊抑或起卸等語山東海口惟利津蒲臺兩處可達通州但口岸較小不能多泊船隻米石亦難多收奉天牛莊西錦州等處存儲糧石截卸較爲省便既據何桂清咨稱飭催各糧船徑赴牛莊等處業已陸續開行自應由奉天驗收著派倭仁前往牛莊督辦是否將漕米起卸囤積倉廩抑或仍令在船暫行停泊俟天津事定再由海道至津並著慶祺景霖飭屬防護妥籌辦理毋致薰蒸霉變是爲至要將此由五百里諭令知之○庚寅諭內閣吳振棫桑春榮張亮基奏回民就撫省城解嚴一招雲南省回民因與漢民構怨糾集多



人於省城外四面屯聚經吳振械等疊次推誠曉諭並派員傳集漢回人等悉心開導均各輸服並據回人出具永不滋事甘結其屯聚省城外之回民二萬餘人咸已解散地方肅清辦理尙屬妥協經此次議撫以後漢回民人可期日久相安惟回人之良善者旣已畏法解散其桀驁不馴者仍當示以兵威以昭公允○桂良等奏英佛二國自定條約五十六款一字不令更易並添出在京居住一層俄人旣不足恃米人又欲開船已令該國幫辦筆墨之華人從中挽回奏入 上諭令遵照寄信諭旨分晰開導俄米條約已定先行具奏以備印證○辛卯諭內閣廖鴻荃奏鄉民滋事據寶瀝陳一摺福建省城設立永豐官錢局經理未能妥治以致民情疾苦本年三月間突有鄉民千百擁至廖鴻荃家將財物搶掠一空該省錢局委員牟利舞弊前已諭令東純等確切嚴辦廖

鴻荃以在籍耆紳猝遭橫逆殊堪眷念著賞銀五百兩由福建藩庫發給祇領並著該地方時加存問以示體恤○諭軍機大臣等僧格林沁奏請飭調投誠義勇赴營協助等語僧格林沁見在帶兵駐紮通州防禦必得熟悉行陣兵將赴營差委藉資禦敵著官文德興阿卽飭勇目詹起綸劉正發蔡連修等帶領精銳義勇速赴通州軍營聽候差遣並著勝保英桂飭令見在該省軍營之京營參將龍汝元遊擊何建鼐迅速赴通帶勇以資得力將此由六百里諭令知之○羅惇衍等奏洋人自踞城後驕橫日甚出城侵犯鄉村該紳士等調派各路團勇迎擊斬其兵總仕邊治一名並於三寶壠地方殺斃夷目二名夷兵百餘名受傷五六十名夷兵敗退乘夜全數入城○以捐輸軍餉永廣江蘇高郵州學額五名寶應二名廣東從化一名○壬辰官文都興阿胡林翼奏藩司李

續賓於四月二十六日由九江馳抵黃安二十八日於北門外督隊進攻斃賊一百餘名平其四壘五月初一日奇右等營過河屯紮初二日副都統舒保率馬隊分布於城之西南何忠駿等各率所部列隊城西賊徑來撲舒保馬隊往來衝突槍箭齊發李續賓以劈山礮轟之賊眾應聲而倒忽西南北三門之賊分股出撲我軍兜圍截殺偏至麥田之中忽旌旗突起槍礮如雷則李續賓先以四哨捲旗而伏也賊大潰棄械而逃馬隊縱橫馳驟將賊衝開頃刻截爲數十段殲斃約一千數百名生擒一百餘名日晡收隊是夜四更時賊開北門潛逃李續賓率各營銜枚暗伏截殺多名追殺四五里舒保何忠駿隔河聞信亦趕至跟追三十餘里殺賊無算先是蕭積仰駐兵於殷家河爲黃安赴麻城要路我兵追賊至此又斃數百人當將黃安縣城克復先是麻城之賊連日閉伏

不出追黃安克復賊於初四夜四鼓不戰而遁道員李績宜副將  
鮑超親率馬步隊日夜窮追自黃土岡至玉屏港沿途殺斃甚多  
見已追至豫省之兩路口及商城之草鞋店先後斃賊三千餘名  
據生擒賊供欲竄河南商城仍乘隙再圖德安襄陽等語查此次  
皖匪竄入楚邊原欲上窺漢陽德安下援九江追潯賊全屠羣醜  
膽落李績賓又卽統師星夜上援臣等亦先於武漢黃德內湖外  
江水陸各要隘層層分布力遏竄路該逆一隅負固援絕計窮方  
得迅逃賊事惟太湖潛山英霍之賊出沒不常而黃梅廣濟蘄州  
蕪水羅田等處警報數至茲黃安麻城賊蹤已盡自應以得勝之  
師越境追剿節節掃蕩以期皖豫一律肅清庶賊上犯無路亦免  
北竄之虞 上諭內閣官文等奏官軍連克縣城越境追剿一摺  
皖匪竄踞湖北麻城另股竄入黃安經布政使李績賓馳抵黃安

督剿四面環攻殺賊無算遂將縣城克復麻城之賊亦不戰而遁  
剿辦甚屬妥速著李續賓等乘勝追剿節節掃蕩以期肅清皖豫  
○諭王懿德等奏官軍剿匪獲勝克復縣城一摺江西逆匪竄踞  
福建光澤縣城經護參將顧飛熊副將賈開泰等督率員弁兵勇  
訂期圍剿都司武明良由南門督勇先登斃賊百餘名其西南賊  
匪被兵勇殺斃無數將縣城克復其竄踞邵武之賊亦經顧飛熊  
督兵馳往攻剿斃賊甚眾剿辦尙爲得手著該督等督飭將弁乘  
勝進兵規復邵武府城盡殲醜類○諭江國霖奏剿辦廣西匪徒  
克復梧州一摺廣西匪徒竄踞梧州府城匪船數百隻圖竄東境  
廣東提督崑壽督帶師船陸勇於三月初旬派流迎剿已革梧州  
府知府陳瑞芝等自募潮勇分路前進三月十七日水師先於德  
慶州河面接仗獲勝副將衛佐邦等繞道迎擊二十七至四月十

一等日封川各屬文武分投堵剿疊有斬擒將該匪江口礮臺焚毀並攻破白田村社學嶺等處匪巢杜其牽掣水陸大兵遂由封川前進斃賊一千餘名匪猶抵死抗拒官軍揚帆直上礮無虛發匪艇破碎漂流悉被奪獲梧城羣賊棄臺而走十八日遂將府城克復著崑壽卽飭水陸將弁會合廣西兵勇將柳潯各屬匪徒一律埽平毋畱餘孽所有出力文武員弁紳士著黃宗漢查明保奏候朕施恩陣亡兵勇著查明請卹○諭軍機大臣等本日據江國霖奏克復廣西梧州並請提關稅三十萬兩充餉各摺片此次克復梧州府城昨據羅惇衍等奏江國霖任用史樸幾至誤事全賴提督崑壽已革知府陳瑞芝等水陸並進得以成功卽據江國霖本日所報亦多係崑壽調度而該革員輒以督辦籌畫自居顯係攘功掩罪所有出力人員已明降諭旨令黃宗漢查明保奏著卽

嚴覈功罪分別獎懲其應請卹之兵勇及從前葉名琛未經查覈之文武下落均著黃宗漢速查具奏至應需兵餉前據柏貴奏撥業經准動銀三十萬兩昨羅惇衍奏復與紳士黃樂之等勸捐銀十八萬兩以濟西餉業已將次繳齊此次江國霖續請之三十萬兩應否如數動撥並著黃宗漢酌量動用固不可使西餉缺乏亦不得任聽濫支至梧州克復後柳州潯州等處尙有匪踞蔣益澧所部湘勇已抵廣西想湖南所備戰船亦可陸續駛到著勞崇光卽飭該員督同將弁迅由柳州象州一帶節節掃蕩直抵潯州與廣東援師會合夾擊以期肅清邊圉該撫務當乘此機會迅圖進剿毋失事機將此由六百里各諭令知之○官文都興阿胡林翼奏浙江軍情緊急藩司李續賓暫難起程赴援業經臣等續悉奏陳見在探聞江西撫州建昌均已收復皆道員蕭啟江等之力臣

等再四思維江西撫建既克惟餘吉安一府有湖南派往援剿之  
曾國荃及湖北派往援剿之劉騰鶴等足敷剿辦蕭啟江兵力甚  
厚其所帶之勇多侍郎曾國藩及羅澤南等舊部久經戰陣其張  
運蘭王開化劉芳貴等所部勇丁尤多精銳若酌量情形再行抽  
調共計不下精兵萬餘聲威甚壯且吉安久經合圍撫建餘匪盡  
竄浙閩地界則江西之兵力實屬有餘應就近由祁門甯國一路  
先行馳援杭州繞出賊前竭力堵剿程途既近應援自捷必能有  
濟李續賓自麻城黃安克復見已帶兵追賊前往豫省商城暫難  
卽撤必當乘勢先清皖北相機進取再金陵賊勢窮蹙非全力注  
於浙江卽分支上犯皖鄂鄂省自咸豐二年至於八年疊被賊擾  
該省爲南北樞紐賊所必爭故六七年之中無日不與兵事相因  
九江雖復而皖北未平竊計目今大局守於境內不如剿於境外



臣等之急於援皖實因皖省切近中原腹地必宜及早肅清相應請旨飭下江西湖南撫臣迅飭蕭啟江張運蘭王開化劉芳貴等各率所部就近兼程先行赴援浙江以期迅捷臣等仍察看河南皖北情形緩急再行隨時奏明辦理上諭浙省自處州失守衢州東門外營盤復陷賊由縉雲竄入永康武義並從間道窺伺諸暨軍情實屬緊急李續賓克復黃安麻城已帶兵追剿潛太賊匪不能赴援浙江惟據官文等探聞江西建昌亦已收復止有吉安一府未復見有曾國荃劉鴻翱等軍足敷剿辦蕭啟江所帶之勇均久經戰陣其張運蘭王開化劉芳貴等所部勇丁亦多精銳統計各軍不下萬餘且距浙省程途較近著耑齡卽飭蕭啟江張運蘭王開化劉芳貴等各率所部兵勇就近由祁門甯國一路兼程前進馳援杭州繞出賊前竭力堵剿石逆見踞常山其鋒甚銳該

撫務飭該將弁等併力攻剿殲厥渠魁是爲至要將此由六百里諭令知之○諭前因安徽臨淮關被陷諭令袁甲三毋庸赴徐卽帶兵勇馳赴臨淮本日據奏見由鹿邑赴徐是前次諭旨尙未接到此時捻匪勢在北趨自應先其所急以固北路藩籬袁甲三諒已遵旨折赴臨淮卽著督帶兵勇迅速進攻並隨時知照勝保會合夾擊其陝甘兵一千名仍著袁甲三調赴該營擇要駐紮另片奏請飭鄭魁士速赴徐宿協剿等語鄭魁士因江南帶兵大員多撥往浙江業經和春調往江南不能改赴臨淮此時徐州已無賊蹤如伊興額史榮椿各軍均可酌量調撥以資策應總以收復臨淮爲第一要著袁甲三務當與勝保悉心籌畫毋誤事機將此由六百里諭令知之○諭桂良花沙納奏呈遞俄米條約並歷陳英佛所請不得不從權允准一摺俄米條約內均有進京一條皆無

久住京城之說英佛豈能偏准桂良等旣言不妨權允亦當與之約定來時止帶人若干到京後暫住若干時一切跪拜禮節悉遵中國制度不得攜帶眷屬如米夷條約內所載每年不得逾一次到京不得耽延或由陸路或由海路不得駕駛兵船進天津海口小事不得援引輕請從人不得過二十名上京時先行知照禮部公館自由中國豫備英夷若能照此亦自可允若必欲住京則前次業經諭及必須更易中國衣冠諒所不願其人數時日及禮節事宜總須照米夷約定載入條款方可允准至鎮江通商原許其軍務完竣後商辦佛夷所請之金陵見爲賊踞不能卽議通商鎮江亦未便先立馬頭仍許其俟長江一律肅清各路軍務告竣再行定議天津一處該夷必欲以登州牛莊相易牛莊究近京畿且爲東三省貨物總匯惟登州尙可酌辦但須載明止准貨船來往

不得於岸上建立夷樓不得攜帶器械駕坐兵船以上三條如其  
照議卽可將條約呈進該夷原約旣不肯更改卽作爲中國所添  
條款與之更約彼所要請我已准至數十條我國所定不過三條  
豈能拒絕閱俄國清字照會有住京及行駛內河已爲阻止之語  
何以桂良等仍以爲請恐係李泰國輩從中播弄額爾金與中國  
人彼此語言文字均不通曉遂致任其所爲俄使旣有此語卽可  
託其踐言以破此疑義况該使臣方以不能力阻英佛爲抱歉止  
此三條又非更改已成之款必當代爲妥議另寄信諭旨一道卽  
宣示俄使可也○諭桂良等奏俄國使臣呈遞照會一摺閱所遞  
文內深以不能力阻英佛爲抱歉具見和好之心據稱不患道遠  
仍欲遣人前來教習技藝修造礮臺等事該使臣旣有備送槍礮  
代爲轉圖之美意朕已嘉其恭順實非他國可比惟旣受其器械

已見惴忱若再令其遠勞跋涉爲中國出力非所以示懷柔可告以毋庸派員前來卽致送槍礮一節大皇帝已深爲嘉許若必肯出力則再向英佛將此次三條代爲說合較之派員教演槍礮修理礮臺尤深嘉悅該使臣感激果出至誠自當再向英佛說合將此三條令其議定至所請卽發回文之處俟擬定後再當封發也

○癸巳內閣欽奉 硃諭前據惠親王等奏請將耆英照軍法從事因命解京嚴訊嗣訊具供詞復令恭親王奕訢等秉公定擬茲據奏稱耆英不候諭旨糊塗冒昧酌擬爲絞監候朝審時入於情實所擬尙無不協惟其聲敘獲咎之由殊非誅心之論不得不明白宣示耆英以負罪之員復加擢用原冀其收效桑榆於事有濟況該員陛辭時面奏力任其難看奴才造化若何似非昧良昏憤者且於四月二十七日抵津後卽有寄諭令其不必與桂良等附

合稍涉拘泥俾其自展謨謀作爲第二步辦法朕用耆英不可謂不專保全之恩不可謂不厚及桂良等奏請令該員回京朕料耆英斷無不知之理尙恐稍掣其肘寄諭仍畱津自酌辦法耆英苟有天良能無汗流浹背乎詎該員拜摺後卽擅自回京藉稱面陳機要試問果有面陳曷不單銜密奏又云難於形諸筆墨何以接奉畱津之旨又愚忠具摺試問摺供之外尙有何機要乎屢次瑣瀆不過爲一首領計況該員供摺內非盡無可採之語未深悉底蘊者尙覺情輕法重不知所說辦法朕與諸臣早經議及況出諸他人則可出諸耆英之口則不可何則蓋耆英乃局中人既有所見自可施爲豈有同辦一事不能補救於事前徒有成說於事後若謂該夷所忌懲辦正墮詭謀蓋耆英藉茲自白乃心不徒盡條前愆且欲誘過於人居心尤不可問自料擅離差次議止罷斥正

遂其身謀優游於家久蒙知遇忍出此耶且迹其心匪特此也同  
桂良花沙納商允照會相對泣於窗下朝不知夕死不聞其恪遵  
前旨另設良圖迫去津時與花沙納云恐此去人心惶惑作爲因  
差暫離津郡抵通接奉寄諭又不聞趕緊折回抽身惟恐不速等  
朕旨於弁髦處處巧詐有意欺罔卽立予駢誅百喙奚辭惟惠親  
王等原參未免過重卽肅順所奏仍擬正法亦未爲是朕之交議  
正因其罪重欲廷臣衡情酌斷暴白於眾若仍予正法何必解京  
又何必定擬且謂其苟延歲月儻以病亡獲保首領比擬更屬不  
倫此乃盜案內斷語難妄加諸耆英朕數日詳酌欲貸其一死實  
不可得卽照奕訢等所擬朝審時必予勾決尤覺不忍棄之於市  
不得已思盡情法兩全之道著派左宗正仁壽左宗人綿勳刑部  
尙書麟魁迅卽前往宗人府空室令耆英看朕硃諭傳旨令伊自

盡以示朕飭紀加恩之至意○耆齡奏四月十二日南豐敗賊糾合大股竄至白舍地方冀犯南豐十四日賊至離城五里之瑤浦村三江口等處王文瑞等率隊出擊鏖戰良久賊陣大亂我軍前後夾擊賊匪四散奔潰追逐十餘里共殺賊一千三百人先是張運蘭等探知建昌大股逆匪屯聚雙泮雲窯一帶欲犯磁圭隨令參將朱南桂等帶兵赴磁圭堵禦四月初九日賊匪二三千向赤家山而來圖襲磁圭之後經朱南桂等擊退十一日雙泮雲窯之賊分路來犯磁圭朱南桂等派隊進擊奮力衝殺共斃賊八百餘人溺斃千餘人補用同知直隸州知州黃秉珍等率寶左護衛兩軍行抵磁圭十四日與朱南桂等會合前進終看地勢甫出山口該逆已出隊來犯徧滿山岡我軍分三路進攻賊大敗潰逐北二十餘里計斃賊千餘人溺死尤眾十六七等日探聞大股逆匪



糾合新豐股匪仍聚雲窩築營四座十八日黃秉珍朱南桂等分  
路進剿賊眾拌死拒鬪我軍陷陣衝突斃賊甚多連踏賊營四座  
建郡之賊大股來援復爲哨官胡寶善等所敗殲黃衣悍賊一名  
餘俱逃回建昌二十二日建昌賊匪萬餘屯聚新豐聲稱渡河來  
犯磁主張運蘭等以新豐爲建昌門戶於二十三日約同朱南桂  
等大舉會攻並令黃秉珍羅近秋等由澤泉茅排並進以分賊勢  
張運蘭等行抵雙泮賊眾已排列對岸遙見新豐賊眾纔屯蟻聚  
當卽分派各營從上游渡河奮擊賊奔潰入墟我軍左右鈔殺  
斃賊二三百人各勇乘勢施放火箭噴筒賊營三十餘座一齊火  
發逆眾若鳥獸散一奔新城一奔建郡我軍追至離郡城八里天  
晚收隊黃秉珍羅近秋等自澤泉茅排進徧郡城西北賊匪四五  
千出拒被羅近秋等擊敗是夜三更建郡賊渠李逆負傷率黨出

城竄往新城二十四日張運蘭等收復郡城追斬賊匪百餘人生擒六十餘人查建昌逆匪分數大股節節扼守勢甚鴟張張運蘭等率領湘寶各勇僅五千人進剿先於南豐磁圭等處數大戰該逆疊受巨創死傷萬餘迨新豐門戶既失恐爲我軍所困遂棄城宵遁得以剋期收復所有出力人員籲懇恩施以示鼓勵 上諭內閣耆齡奏官軍進剿建昌獲勝收復郡城前後殺賊無算在事員弁等著有微勞自應量予鼓勵由江西派出員弁著耆齡查明保奏由湖南派往員弁著駱秉章查明保奏另片奏東鄉踞城之賊被候補知縣黃振成屢次擊敗於四月二十三日克復縣城等語所有在事出力員弁並耆齡查明保奏○甲午諭內閣禮部尚書銜前任禮部侍郎杜堉品行端方學問醇粹嘉慶年間由翰林洊升內閣學士蒙 皇考宣宗成皇帝擢任侍郎出典文衡服

官三十餘年持躬清正辦事勤慎引疾後復蒙 御賜匾額並因重赴鹿鳴筵宴 賞給頭品頂帶加太子太保銜以示光榮朕御極之初復親頒宸翰賞資優加伊子追贈大學士杜受田前在上書房輔導朕躬深資匡弼嗣於江蘇差次病故復推恩其父晉秩尚書賞食全俸洎壽登九表晉加太傅銜賞戴花翎以示優禮方冀克享期頤用作熙朝人瑞茲聞溘逝悼惜殊深著賞給陀羅經被派貝勒載治卽日帶領侍衛十員前往奠醊加恩晉贈大學士卽照大學士例賜卹並賞給廣儲司銀一千兩經理喪事本月二十三日朕親臨賜奠伊曾孫杜庭玉杜庭璆著吏部查明俟及歲時帶領引見候朕施恩應得卹典該衙門察例具奏用示朕篤念耆臣優加恩眷之至意尋予祭葬諡文端○諭軍機大臣等英桂奏楚匪闖入光商並豫兵不能分撥一摺昨據官文等奏湖北官

兵連次克復黃安麻城李續賓已移得勝之師前往商城地界越境追剿光商一帶自應派兵夾擊以防北竄英桂等見將駐紮鹿邑之馬步兵勇撥往救援並將陝西官兵一千名及羅山練勇七百名均撥歸邱聯恩調遣著卽飭令合力堵剿並飭該地方官招集團勇協同剿辦務將竄匪悉數殲除毋令滋蔓至懷蒙捻匪回竄雒河朱連泰一軍著仍駐亳州防剿徐州境內已無匪蹤前經諭令袁甲三攻剿臨淮其歸陳所屬堵禦未容稍懈鹿邑存營之兵尙有二千名著該撫等嚴密布置毋稍大意將此由六百里諭令知之○以廉兆綸爲戶部右侍郎病痊○乙未諭軍機大臣等前因江西賊匪竄入浙江之常山開化圍逼衢州府城疊由江南徽州等處調撥援師馳往救援恐官軍無所統屬特加漳州鎮總兵周天受提督銜督辦浙江防剿事宜嗣因處州失守並攻陷金

華所屬之永康武義二縣恐周天受資望較淺未能統率眾軍復諭和春前往督辦茲據和春奏見在患病未痊刻難就道東南大局攸關必須聲威素著之大員督率各軍方能措置裕如曾國藩開缺回籍計將服闋見在江西撫建均經克復止餘吉安一府有曾國荃劉騰鶴等兵勇足敷剿辦前諭耆齡飭令蕭啟江張運蘭王開化等馳援浙江該員等皆係曾國藩舊部所帶勇丁得曾國藩調遣可期得力本日已諭令曾國藩馳驛前往浙江辦理軍務著駱秉章卽傳旨令該侍郎速赴江西督率蕭啟江等星馳赴援浙境與周天受等各軍力圖掃蕩該侍郎前此墨經從戎不辭勞瘁朕所深悉見當浙省軍務喫緊之時諒能仰體朕意毋負委任何日啟程並著迅速奏聞以慰廑念將此由六百里各諭令知之○桂良花沙納奏各國條約已定前命屬俄使挽回之處已不能

行俄國欲派人修理礮臺教演槍礮止派十人或五人前來奏入  
諭桂良等照會俄國酌派數人教演槍礮修築礮臺並加嘉獎英  
佛條款卽日鈔錄進呈○命前任兵部侍郎曾國藩馳赴浙江辦  
理軍務○以胡興仁爲甘肅布政使前廣西布政使○予江西陣亡縣丞  
尹世堂等祭葬世職○丙申 上臨故大學士裕誠第賜奠還宮  
○諭內閣大學士裕誠溘逝業經降旨優加賜卹本日朕親臨賜  
奠見其遺孤幼稚殊深愴感因思裕誠人品醇正數歷中外奉職  
勤能著加恩入祀鄉賢祠伊子堃林俟及歲時由該旗帶領引見  
以示朕眷念盡臣恩施優渥至意○丁酉 上臨故尙書銜前任  
禮部侍郎杜堦第賜奠幸圓明園○諭內閣贈大學士太傅禮部  
尙書銜前任禮部侍郎杜堦溘逝業經降旨優加賜卹本日朕親  
臨賜奠推恩舊學愴感於懷因念杜堦植品端方學有根柢從公

夙夜克勵清勤著加恩入祀賢良祠將來靈柩回籍時派貝子綿  
勳前往祖奠目送並著沿途地方官妥爲照料護送以示朕眷念  
耆臣施恩優渥至意○戊戌諭軍機大臣等勝保奏進駐懷遠派  
兵赴鳳陽一帶剿賊獲勝一摺並統籌全局請專責成等語前因  
臨淮失陷疊諭袁甲三前往該處堵剿茲據勝保奏六安等處已  
無須李孟羣兼顧請飭令前赴臨淮助剿自係爲力遏北竄起見  
著勝保福濟卽飭該藩司前赴該處幫同袁甲三剿辦該藩司見  
已赴廬著卽由定遠一帶繞道前往毋稍遲緩此時徐宿軍情較  
緩伊興額史榮椿兩軍均歸勝保調度其攻剿情形亦由勝保袁  
甲三會同奏報儻徐宿有警仍由伊興額等專摺奏聞以期迅速  
而免貽誤勝保見駐懷遠於南北軍情自可統籌兼顧設賊勢竟  
欲北犯卽著繞道蒙宿力行堵遏以全大局光商竄匪已有湖北

兵勇追剿其洪澤湖等處並著庚長添派兵勇嚴防以杜捻逆東竄之路至勝保所請帶兵北上之處奮勇可嘉已於該都統密奏內批獎此時天津夷務已就平靜勝保著毋庸北來惟當將皖豫捻粵各匪迅速剿辦肅清以副朕望將此由六百里諭知勝保袁甲三庚長福濟伊興額史榮椿並傳諭李孟羣知之○勝保奏請幫同僧格林沁辦理夷務得旨爾謀猷國事之心深堪嘉尚朕覽甚悅惟見在夷務將竣毋庸照爾所請行另有寄爾諭旨○命吏部左侍郎匡源內閣學士署刑部左侍郎文祥在軍機大臣上學習行走○廣西巡撫勞崇光奏報收復平南縣城得旨嘉獎○于安徽陣亡縣丞嚴銘等祭葬世職○己亥官文都興阿胡林翼奏五月初二日太湖踞賊圖撲蘄州官卡經道員唐訓方擊退後連日偵知該逆復由安慶英山糾集大股二萬餘人至彌陀寺南陽



河一帶築壘初八日逆匪分爲三股一由彌陀鎮一由桐油沖一由黃泥畝均奔界牌石距蘄州邊界僅數十里勢甚猖獗唐訓方等分兵三路迎剿甫至界牌石該逆遽擁而前同知丁銳義等衝鋒接戰賊之中路先潰而右路之賊屯聚山岡排列不動經遊擊張嵩齡設計誘下擊斃多名丁銳義等復乘勝掩殺分兵直上左路山岡四面兜剿各處團勇亦繞鈔賊之回路斃賊千餘名墜崖溺水死者不可勝計餘賊四散竄逃我軍跟追數十里毀其賊壘而還據生擒賊供此次大股逆眾竄圖直犯蘄州救援麻城知我下游馬步調赴安麻料蘄界兵單必可逞志初不知安麻先已克復也十三日太湖踞賊又由安吳河至桐山沖之馬槽由白洋堡至界牌石卡外由黃龍菴至界牌石之右分三路放火搶擄約五六千人丁銳義等率隊禦之該逆旋即退去我軍追及於彌陀鎮

四面圍之賊遂逾山越嶺而逃計殺斃及墜崖落澗死者約數百人我軍追殺至對河而止查皖省匪勢蔓延蓄志犯楚臣等前於安麻克復後屢接蘄州等屬警報已飛調仁智等營前往會剿並咨李續賓撥兵援應乃該逆料我兵單糾眾竄擾而駐蘄之師不滿三千名竟能以少克眾大獲勝仗實足寒逆膽而振軍威出力將士容臣等分別查明請獎上諭內閣皖省太湖之賊圖撲蘄州糾集二萬餘人至彌陀寺等地方該將弁等於賊眾來犯以少勝多實屬奮勉出力著官文等查明保奏○庚子諭軍機大臣等本日據福濟奏鳳陽府縣城池失陷塔思哈帶兵二千見駐定遠黃元吉等收集潰勇擬紮紅心驛能否堵遏尙未可知等語捻匪先踞臨淮復陷鳳陽勢成犄角勝保見既行抵壽州已派兵前赴懷遠距鳳陽不過數十里袁甲三如已行抵臨淮距鳳陽亦止數

十里擒匪既經攻陷府城勢已燎原不可不先其所急勝保係督  
剿三省擒匪大員凡剿辦擒匪各軍屢次降旨統歸該都統會同  
袁甲三調度尙何慮其呼應不靈著卽迅籌進剿速克兩城不特  
匪蹤北竄亟應堵遏卽東竄之路亦應迎頭兜截福濟所派麟瑞  
等各軍在臨鳳一帶者均著勝保就近調度分路夾擊以期得力  
萬不可專顧西北致賊東趨至麟瑞本歸福濟節制李孟羣係本  
省藩司均應聽福濟調度傳振邦一軍已准畱於甯國軍營並未  
前赴徐州洪澤湖等處已有旨令庚長添派兵勇扼要嚴防矣將  
此由六百里各諭令知之○予安徽陣亡典史周士達等祭葬世  
職○癸卯諭軍機大臣等官文奏楚軍水陸東征籌策調度一摺  
湖北官兵克復九江黃安麻城軍威已壯自應水陸乘勝進剿皖  
豫先清江北爲直搗金陵之計官文所籌各條尙屬周妥九江地

勢扼要官文等已撥兵五千駐守江西兵勇多赴浙境追剿竄匪  
能否抽兵五千同守九江之處著官文等知照耆齡籌辦楊載福  
師船下駛會合蕪湖紅單船後亦卽知照和春德興阿飭令帶兵  
之員與楊載福和衷商辦江北一帶全滁和州之賊急欲應援金  
陵德興阿已飭各營剿辦矣擒匪回竄懷遠臨淮鳳陽先後失守  
勝保見駐懷遠袁甲三亦折赴臨淮亟應迅圖克復節節南偏李  
續賓由中路進攻都興阿由宿太進兵楊載福直攻安慶皖北之  
賊當可次第肅清所有楚軍馬步水師應需糧餉仍由官文等豫  
籌撥解至運送糧餉軍火等項著何桂清福濟英桂瑛榮先期派  
員攜帶經費探明大軍進止分段設站隨時轉運以利進行至所  
撥楚軍餉項收支各數在皖者咨送皖省在豫者咨送豫省入蘇  
境則咨蘇省各該督撫卽飭承辦之員仍照湖北章程銷算以便

稽查而免輻輳楚軍進剿皖豫水陸各軍卽責成都興阿李續賓楊載福統制他省帶兵大員不得調歸統轄以一事權而期得力見在皖豫兩省賊勢蔓延官文等分飭諸軍水陸並進實爲全局關鍵勝保袁甲三務與都興阿李續賓同心勦力迅殄逆氛以收師克在和之效將此由六百里各諭令知之○諭前因奉天牛莊沒溝營等口岸停泊海運漕船當經降旨准將該船攜帶二成貨物卽在該處銷售免稅見在天津夷船將次退竣著文彩崇綸確切探明如各夷船盡數開行海口肅清卽著飛咨慶祺倭仁等仍令原船由海道迅赴天津交米由文彩等驗收蘇省委員卽可毋庸前往牛莊以歸簡便將此由五百里各諭令知之○諭晏端書奏賊竄壽昌派兵攻剿一摺壽昌爲金衢嚴三郡咽喉重地見被逆匪竄擾情形甚爲喫緊雖經周天受調派各軍分路堵剿而蘭

谿之小畝嶺等處已有賊蹤周天培一軍行抵蘭谿務當先清該處之賊庶可卽赴壽昌會剿其李定太一軍經和春責成督辦衢州防剿據奏見抵遂安著就近將壽昌之賊先行剿除見在和春患病是否卽可就痊如尙未能卽日赴浙著將援軍遙爲調度其各路要隘應行防範並著晏端書妥爲布置周天受督攻武義業已得手卽可乘勝進剿以杜下竄至福興由衢至遂安旣在途次探知賊蹤內犯並不暫駐壽昌以示聲威實屬畏蕙無能其往返幾及兩旬是否故意耽延著和春確查參奏毋稍徇隱將此由六百里各諭令知之○甲辰諭內閣前因夷船闌入大沽海口礮臺被占當將署天津鎮總兵達年署大沽協副將德魁革職拏問直隸提督張殿元副都統富勒敦泰均革職畱營護軍統領珠勒亨革職畱營以示懲儆所有達年德魁張殿元等著譚廷襄仍遵前

旨審訊查明分別具奏其珠勒亨富勒敦泰二員僅予革職畱任  
畱營恐尚不足蔽辜侍郎國瑞所帶京兵雖未衝散亦未能前進  
應援並著僧格林沁分別查明參奏○諭軍機大臣等本日巡防  
王大臣等奏撫局已定酌撤京兵並擬查海口情形一摺見在天  
津夷船全數退出內河前經派出駐紮八里橋官兵自應先行裁  
撤通州以東各營暫令照舊駐紮各處調到官兵將次抵京亦可  
分別調度其由天津至海口一帶卽應豫爲防範嚴密布置著僧  
格林沁卽行來京面授機宜所有通州各營盤著派西凌阿照看  
○桂良花沙納奏夷船全數開出內河命俟各夷船全行放洋後  
來京覆命○命甘肅布政使胡興仁馳赴浙江會同前任兵部侍  
郎曾國藩辦理軍務○予直隸陣亡遊擊沙春元等祭葬世職○  
是月免湖北蘄州等十四州縣被旱被擾地方舊欠額賦及雜項

錢糧展緩安徽亳州等五州縣暨河南確山等三縣被擾地方舊欠額賦



東華續錄

咸豐八十

臣王先謙敬編

臣陶澐宣恭校

六月乙巳朔諭軍機大臣等袁甲三奏行抵徐州剿匪情形並片奏酌度緩急不能遽赴臨淮各等語捻匪窺伺徐郡飄忽靡常由北而南節節進剿自係正辦然必須與南路之兵聲息相通始能互相聯絡袁甲三既稱臨淮以北賊圩林立必須次第掃蕩著准其暫駐徐州將附近該郡匪巢實力掃除卽行進駐宿州與勝保合力夾擊勝保到壽州後聞鳳陽失守之信當已督兵前進袁甲三不能遽赴臨淮想經知會勝保該都統自當由懷遠進兵直薄鳳陽使賊蹤不敢踰臨淮而北則南北兩軍皆可會合臨淮一路前經勝保奏請令李孟羣前往幫同袁甲三剿辦業經諭知該藩

司本日據李孟羣奏欲候川餉解到前赴廬州商路進取舒桐自係未經奉到前旨茲已諭令速赴廬郡與福濟商定行止先以北路爲急見在臨淮勦匪勝保已派何員前往如仍須李孟羣赴彼卽著咨明福濟飭令北來毋任遲滯袁甲三請飭傅振邦帶兵赴徐之處已諭和春張國樑照辦矣將此由六百里各諭令知之○諭前因臨淮失陷並據勝保奏六安等處已無須李孟羣兼顧曾諭該藩司由定遠一帶繞道前赴臨淮幫同袁甲三勦辦本日據李孟羣奏俟六安善後事宜布置釐定卽當進攻舒桐並擬赴廬與福濟面籌大局惟須俟川餉到後方能啟程等語該藩司籌攻舒桐自係爲肅清南路起見惟捻匪自竄踞臨淮後復陷鳳陽勢已燎原自應先其所急以杜該逆北犯李孟羣旣須赴廬州與福濟會商機宜著卽啟程前往不得以守候川餉致涉遲延到廬後

與福濟商定行止或仍赴臨淮或援應滁全均以遏該逆北竄之路俟北路稍定再圖舒桐其時湖北官軍當亦可以東下兩路夾攻不難埽除巢穴也將此由六百里各諭令知之○諭袁甲三奏淮北賊勢蔓延請飭總兵大員帶兵助剿等語江南徐州鎮總兵傅振邦前經和春遵旨飭令帶兵一千名赴徐進剿嗣因徐州軍務稍鬆復經和春奏明仍令折回灣沚見在淮北一帶賊眾兵單伊興額又因接仗受傷恐急切不能帶隊當此軍情喫緊之際必得勇敢大員前往督率勦辦方可得力著和春等卽飭傅振邦酌帶兵勇迅速前赴徐州毋稍延緩其鄧紹良軍營防剿事務卽著和春另派大員幫同辦理將此由六百里諭令知之○丙午諭內閣前因曾望顏請將捕蝗不力之知縣等懲處當經降旨將陝西藍田縣知縣李夢荷署華陰縣知縣畢賡言革職暫行畱任茲據

吏部奏稱覈與定例不符請旨遵行等語李夢荷畢廣言均著照  
議革職拏問以爲玩視民瘼者戒嗣後各省督撫務須悉依定例  
不准稍涉於寬○丁未諭軍機大臣等前因僧格林沁奏請飭調  
投誠義勇赴營協剿當經諭令官文德興阿卽飭勇目詹起綸劉  
正發蔡連修等帶領義勇赴通州軍營聽候調遣見在天津夷船  
已退所調各路之兵俱可陸續酌撤所有前調之勇目詹起綸等  
三名均著仍畱各該大臣軍營差遣毋庸帶勇前赴通州將此由  
五百里各諭令知之○己酉駱秉章奏湖南援江官軍自克復臨  
江府城後臣以江西各股逆賊久踞撫建爲老巢逆首石達開退  
竄撫州遣黨分布撫建所屬各縣人數甚眾非節節接剿不能進  
擣撫建巢穴隨飭卽選道蕭啟江知府劉坤一帶領各軍分由新  
淦進取崇仁以圖撫州卽選道張運蘭等率所部由吉安趨永豐

進取樂安宜黃以圖建昌維時撫州大股逆賊知臨江大軍將渡  
贛而東率眾五六萬屯踞何家村等處將俟援軍渡贛仍襲取臨  
江府城正月初九日蕭啟江田興恕簡銳卒出賊不意擊之破賊  
營十一座斃賊二千餘名賊懼官軍大隊復至悉眾遁回撫城二  
十九日江軍收復新淦縣城蕭啟江劉坤一隨率所部渡贛分路  
而進二月二十九日蕭啟江擊賊於崇仁縣屬之白波墟三月初  
六日進逼崇仁縣城賊由西南北三門出拒官軍分隊迎擊斃賊  
數百賊敗入城是夜三更城中火發賊由東門竄出遂復崇仁縣  
城十八日蕭啟江進軍上頓渡距撫州城十五里築營建昌之賊  
見官軍漸逼撫郡遂率黨數千將由龍骨渡以陷崇仁劉坤一偵  
知之率五成隊銜枚疾進二十二日黎明抵龍骨渡西岸賊倉卒  
出禦劉坤一急揮所部涉淺而過斬先鋒賊十餘人餘賊潰走各

槍礮不絕城內人聲鼎沸二十日賊開東門竄出蕭啟江揮所部緣梯蟻附而入劉于濤所部亦由北梯城而入該逆自相踐踏賊屍枕藉官軍巷戰數時殺賊一千七百餘名隨復撫州府城此蕭啟江劉坤一等一路獲勝收復崇仁縣城撫州府城之實在情形也其張運蘭王開化之由永豐進者二月初八日進紮太湖坪盤安洲等處樂安賊悉退踞縣城普承堯適自吉安帶親兵馳至會商參將朱南桂等各派隊攻城破城外賊營六座斃賊六百餘名十五日各營齊偪城下是夜暗伏壯士於城外舊壘三更城賊悉由東北兩門竄出伏兵鼓譟乘之賊自相踐踏死者百餘遂復樂

安縣城張運蘭王開化旋由樂安拔營進攻宜黃三月初四日張運蘭所部行抵官倉距宜黃縣城數里探報城賊已於初三日夜由仙人都竄遁遂復宜黃王開化由桃陽前進已於初六日會同蕭啟江劉坤一克復崇仁於是建昌賊首復令死黨屯踞藝圭墟將伺隙復犯崇仁宜黃以斷撫州大軍後路二十一日張運蘭等率師前進比近藝圭二三里許皆令捲旗潛行而以團勇誘賊俟其近前分三路鈔之斃賊不少立將藝圭墟賊巢攻破餘匪竄回建昌城中是役計斃賊一千六七百名墜巖死者無算張運蘭王開化破藝圭墟後本擬拔營進攻建昌探報南豐屯賊甚多雩都竄出之賊亦前來會合人數約近二萬蔓延厚坪水南一帶巢穴甚多張運蘭王開化分路進剿往返百餘里將南豐以北建昌以南賊巢十餘處一律掃除斬賊二千有餘四月初九日南豐縣賊

聞各股賊敗卽於初七八兩日冒雨駕筏棄城東渡張運蘭王開化令幫辦王文瑞等收復縣城安撫居民暫爲駐守十八日建昌賊會合新豐股匪來雲窠雙油築四大壘附近結草營數十座將堅阻官軍攻建之路朱南桂等會商及其未定擊之遂各率所部分路並進將賊所築營壘概行踏盡二十二日建昌賊傾巢而出屯於新豐張運蘭王開化於是夜三更率全軍趨之二十三日黎明行抵雙油甫經安營賊隊已徧布對岸張運蘭等令朱南桂胡兼善各率所部分從上下游涉淺過河而自率各勇繼之對岸之賊甫過河而來各勇槍礮齊施紛紛墮水張廣勝等揮眾衝渡賊望風潰走乘勢銳進連毀賊營三十餘座斃賊無數餘賊一由尙塘墟奔新城一由大路奔建昌張運蘭等乘勝追逐至距建昌府城八里之陳家山始收隊回營是夜賊卽棄城而遁張運蘭等遂



於二十四日收復建昌府城餘賊向新城一路紛竄探報撫州逸出餘匪有與此股敗賊併竄閩界之說張運蘭等擬俟賊有定蹤卽會合兜剿此張運蘭王開化及江軍寶勇一路疊勝先後收復樂安宜黃南豐三縣及建昌府城之實在情形也臣維江西撫建兩郡逆賊踞爲老巢自蕭啟江劉坤一等率師渡贛而東張運蘭王開化及普承堯所部寶勇四營由永豐前進節節梭剿三月之間郡縣城池先後收復進止機宜尤爲允協卽選道張運蘭等先行開列擬請分別獎勵其餘在事出力員弁勇丁可否由臣查明保奏出自天恩上諭內閣湖南兵勇援剿江西三月之間先後收復府縣城池辦理尙爲得手卽選道張運蘭著賞加按察使銜知府王開化著以道員選用同知王文瑞著免選同知以知府選用其餘由湖南派往出力之員弁勇丁著駱秉章查明保奏○

諭軍機大臣等前因逆匪竄擾浙江特命和春兼辦江浙兩省軍務後因和春患病未能卽日赴浙降旨令曾國藩馳往浙江辦理軍務矣茲據駱秉章奏擬分撥楚軍援浙並請飭曾國藩統率前往與前降諭旨適相符合據奏見在援江各軍多係曾國藩舊部如該侍郎統帶赴浙必能將士一心並慮及勇餉一項江西既不  
能籌浙江能否供應尙難豫揣擬由湖南每月籌解銀二萬兩作爲援浙勇餉實能統籌大局不分畛域著卽照辦惟湖南一省既能兼顧浙江湖北省亦當竭力籌畫著官文胡林翼按月籌解餉銀二萬兩專供曾國藩一軍之用該侍郎兵力旣精餉需又足必當迅速奏功已定何日啟程卽著駱秉章傳旨令該侍郎卽行馳奏將此由六百里各諭令知之○戶部奏兩江總督何桂清請將上海洋貨義捐給予議敘恐有違禁物件在內未便覈准得旨往

返駁查必致以後報捐之人心懷觀望著准其照海疆章程給予  
獎敘况既據奏稱係洋貨自無違禁之物尤不值一查○命大學  
士桂良吏部尙書花沙納工部右侍郎基溥武備院卿明善馳往  
江蘇會議通商稅則事宜○江西巡撫耆齡奏官軍克復新城金  
谿二縣報聞○予江西陣亡縣丞賈啟祺等祭葬世職○庚戌諭  
黃宗漢飭廣東紳士布政使銜伍崇曜前任鹽運使潘士成赴上  
海聽候桂良等差遣○辛亥諭軍機大臣等前據官文奏楚軍水  
陸東征進剿皖豫先清江北茲據福濟奏稱探聞李兆受大股竄  
併滁州攻撲清流關請飭李續賓迅速來皖等語捻首李兆受曾  
據勝保奏稱有投誠之意何以復攻清流關欲與臨淮鳳陽巨捻  
勾結北竄福濟所派參將尹善廷一軍見在被圍甚急總兵嵩瑞  
等帶兵援剿尙恐不敷分布袁甲三因徐州喫緊未能前赴臨淮

若令該逆勾結鳳陽等處擒匪則勝保一軍亦形單弱此時皖北情形萬分緊急著李續賓迅速前進卽由舒城廬江圍繞而南使擒匪粵逆不能勾結並著官文胡林翼飭令舒保督帶馬隊隨同進剿仍隨時查看皖豫兩省情形相機策應總期節節南偏毋令北竄將此由六百里諭令知之○諭據福濟奏探聞擒逆李兆受大股竄併滁州攻撲清流關欲與臨淮鳳陽巨擒勾結北竄等語該逆李兆受前經勝保等奏業已遞稟乞降會諭令設法籠絡俾得效用茲福濟探聞之說未知是否訛傳抑係確實此輩狼子野心反覆原在意中勝保如能相機駕馭俾仍悔悟投誠更屬妥善特不可墮其術中至清流關一帶參將尹善廷帶兵扼守見在被圍甚急雖經福濟飭令總兵嵩瑞副將惠成帶兵前往會合塔恩哈等援剿兵力尙形單薄袁甲三見因徐州緊要未能卽赴臨淮

著勝保察看情形力籌策應以杜該逆北竄之路本日已諭令李  
續賓由舒城廬江圍繞而南以期合力剿辦勝保見駐懷遠著卽  
悉心調度並遵照前旨將鳳陽懷遠兩城迅速攻克袁甲三由徐  
州自北而南與勝保會合毋令匪眾更肆蔓延將此由六百里各  
諭令知之○諭蔣霽遠奏餉項支絀懇請添撥一摺貴州都勻思  
南等處賊氛未靖帶兵各員分路進剿鎮遠黎平兩府及獨山荔  
波各州縣處處防剿需餉甚鉅雖山陝四川等省尙有未解銀二  
十一萬餘兩但積欠過多解到後亦不敷分撥著王慶雲恆福會  
望顏再行各籌銀五萬兩同前未解之項陸續分起解往貴州其  
湖南欠解貴州協餉亦著駱秉章速籌銀三萬兩就近解交鎮遠  
黎平兩府以濟急需將此由六百里各諭令知之○癸丑諭軍機  
大臣等王懿德等奏福建軍情緊急請飭調兵援剿一摺據稱浦

城松溪政和等縣被賊踞守邵武逆匪勾結土匪時圖下竄建甯縣城失守賊援踵至情形萬分緊急江西浙江毗連該省自應不分畛域實力兜剿張運蘭蕭啟江各軍前已諭令赴浙助剿見在別無可調之兵福興由玉山至衢州屢失事機本日已有旨令其來京另候簡用該將軍帶往玉山兵勇著卽交耆齡會同周天受酌派得力將領統領赴浦城等處援剿將失守各屬力圖攻克不可稍有遲延致誤事機將此由六百里各諭令知之○諭本日據楊能格奏江北糧臺用款支絀請飭催各省欠解協餉以濟急需等語見在江北一帶賊氛尙熾一切調兵募勇軍裝器械需費甚多全賴外省協濟之款以資應用著瑛棨崇恩曾望顏各將應解江北協餉按月設法寬爲籌濟毋誤要需至山西近日撥解京餉以及各省協餉爲數已屬不少惟江北需餉甚急仍著恆福督飭

藩司酌量撥解將此由五百里各諭令知之○命西安將軍福興

來京○命桑春榮來京以張亮基爲雲南巡撫

已革山東巡撫

○甲寅諭

內閣勞崇光奏紳士集團克復州城等語廣西象州於咸豐六年

四月間被潯州艇匪闖入經該撫飭令辦團紳士候補知縣韋任

元等集團攻剿本年四月該紳等先將城外賊巢攻破以孤其勢

隨復督練進剿殺賊數百名生擒五十六名奪獲礮械無算當將

州城克復該紳等義勇可嘉著該撫擇其尤爲出力者奏請獎敘

以示鼓勵○乙卯諭內閣工部奏捐修各工請飭遵例報銷一摺

各直省修辦工程例應造具工料銀兩細數清冊報部覈銷近年

以來地方勸捐修理及借墊庫項再令民間攤徵歸款各工或請

造冊報銷或請免其造報辦理未能畫一且所捐銀錢有經各該

督撫奏請給予獎敘者卽與動用正款無異豈可漫無稽察致滋

冒濫嗣後除銀數在五百兩以下工程無關緊要及數在五百兩以上而係民間捐修並不邀請議敘亦未借用官項者均免其造報其餘士民出貲捐修奏請獎敘地方官勸辦請獎並給予實在官階以及例應民修之河道隄岸橋座等工有關田廬保障先行借動官項仍由民間攤徵還款或商民竈戶借動官項分年攤捐歸款者均著一體造冊報部覈銷予以保固限期以符定例如各該督撫有違例奏請者卽著該部奏請議處○官文都興阿胡林翼奏皖省太湖英霍之賊於五月十五日進逼太湖縣彌陀鎮沿河築壘同知丁銳義等分由桐山冲等處進擊殺賊五六百名英山又有另股賊匪來犯十七日傾巢而出於太湖縣彌陀鎮河岸山岡層密列陣遊擊余際昌等由左路進逼賊卽奔潰我軍以賊不戰而潰必有狡計均屹立以待旋見山溝伏賊突出守備唐啟



虞等首先衝敵參領巴彥都楞率馬隊繼之追殺七八里將太湖縣彌陀鎮附近賊壘木柵全行踏平斃賊千餘名我軍於十九日五更時直逼太湖之南陽河未及交鋒賊卽潰走我軍奮力窮追賊四散奔逃殲斃四五百名平壘三十餘座太湖之賊於二十日下退石牌同日英山之賊亦退至黃栗杪一帶見在李續賓已調派副將趙克彰等九營先期馳赴英山探明太湖六安等處賊情相機進剿李續賓自率大隊前往會合以便肅清皖北節節掃蕩上諭皖省太湖英霍之賊窺伺蘄黃邊境並於彌陀鎮南陽河等處築壘抗拒同知丁銳義等帶領兵勇由桐山沖界牌等處分隊進擊將附近彌陀鎮之賊壘木柵全行踏平餘賊全數敗遁我軍直逼南陽河賊卽奔潰平壘三十餘座太湖英山之賊均已退至石牌黃栗杪一帶楚境一律肅清剿辦甚爲得手著官文等仍

嚴飭帶兵將士分路追剿節節掃蕩肅清皖北以靖逆氛○丙辰諭軍機大臣等前於四月二十九日有旨諭知福興令其俟衢州解圍後卽帶所部兵二千五百名馳赴浦城一帶進剿閩省之賊迄今月餘何以尙未接到昨復寄諭該將軍令其來京另候簡用其所帶兵勇卽交周天受會同耆齡酌派得力將領統帶馳赴閩省援剿該將軍本日奏報既未遵旨赴閩又復督戰受傷著卽啟程回京不必再畱衢郡周天受接奉昨降諭旨應派何員帶兵赴閩或聽耆齡酌派或就近與晏端書商派以期迅速並著安籌具奏壽昌賊匪已退竄上方李定太帶兵素稱得力今福興所帶兵勇旣派赴閩省恐衢城兵力稍單著晏端書卽飭該總兵俟壽昌匪徒剿除後酌量情形先其所急或馳赴衢州與饒廷選等殲除城外賊壘再圖克復失陷各縣使賊蹤不至續來則下游剿辦亦

易得手晏端書周天受等當通籌緩急分投剿辦毋致顧此失彼  
貽誤事機將此由六百里各諭令知之○丁巳諭內閣巡防王大  
臣奏請將糧臺用過銀錢款目飭部覈銷一摺巡防糧臺支發各  
項業經分款造冊著照惠親王等所議咨部查覈並著將用贍銀  
錢派員照數繳還部庫以清款項所有巡防糧臺著卽裁撤各旗  
營巡防及五城團防著一併裁撤○諭晏端書奏總兵統師攻復  
壽昌縣城見赴衢州會剿一摺壽昌逆匪竄入蘭谿之界子嶺總  
兵李定太自遂安馳抵湯谿將沿路賊卡盡行燒毀進逼壽昌東  
門外七里亭五月二十八日調派兵勇分路夾擊直抵賊巢沿途  
斬獲無數當將縣城克復李定太見已就近馳赴衢州會剿著卽  
乘此聲威痛加剿洗迅解城圍毋稍遲誤衢州鎮總兵饒廷選所  
轄地方連失三城不能進圖規復實屬因循貽誤著卽革職仍帶

罪畱營以觀後效○諭軍機大臣等德興阿奏福濟辦理安徽軍務不事攻剿恐致貽誤請飭翁同書前往安徽剿辦並鈔錄德安信畱呈覽一摺福濟徒知株守日久無功已降旨令其來京另候簡用並授翁同書爲安徽巡撫督辦軍務矣翁同書接奉此旨卽著帶官兵馳赴新任務須力圖整頓俾皖省軍務日有起色方爲不負委任德興阿軍營辦理文案需人著卽揀選妥實可靠之員接手辦理爲要此時金陵尙未克復江北之防不容稍懈若克復九洑洲後該大臣移營赴皖恐該逆乘虛北竄實於大局有關見在李續賓已由楚赴皖掃蕩皖北賊匪都興阿亦由宿太前來廬州一帶攻剿可期得力德興阿請帶兵前往安徽之處著毋庸議此次鞠殿華攻剿全椒身受重傷實屬奮勇可嘉著發去如意拔毒散四料交該總兵祇領將此由六百里諭令知之○德興阿奏

鞠殿華進剿全椒賊匪受傷甚重得旨具見伊之奮勇軫念殊深然爲大將者身先士卒之中尤應加以慎重以副朕委用之恩○

革福濟頭品頂帶太子太保命來京以翁同書爲安徽巡撫督辦

軍務

候補侍郎

○加給八旗賑米三月○戊午諭軍機大臣等見在夷

船全數退回所有前調之哲里木昭烏達兩盟官兵各一千名是

否應畱何處兵一千名以備調用抑或全數撤回著僧格林沁酌

量奏明所有應撤官兵尙須酌給獎賞再前據伊興額奏請飭調

察哈爾馬五百匹等語曾諭該副都統俟天津夷務辦竣再行挑

撥並著僧格林沁察看情形能否於察哈爾調京馬匹內酌撥三

四百匹赴伊興額軍營之處一併具奏將此諭令知之○己未諭

內閣前因李鈞奏寶鈔見無出路河工經費請全撥實銀一摺當

交戶部速議具奏茲據該部奏稱河工用項近年均以鈔八銀二

搭放因本年春閒該河督奏稱用項不敷已酌議撥給寶鈔六成實銀四成較之前定銀數已加二成請飭該河督仍遵前次奏案辦理等語所奏自爲撙節經費起見惟念運河修工緊要鈔票亦難疏通著再加寶銀一成嗣後撥給運河經費實銀寶鈔卽著各半搭放該河督務當力裁冗費毋得再行瀆請至道庫欠撥各廳之款係早經辦過工程自應仍照前定章程發給以杜牽混○賞已革兩廣總督徐廣縉五品頂帶赴勝保軍營隨同辦理軍務○庚申諭內閣前任戶部尙書孫瑞珍持躬謹慎學問優長由翰林入直上書房蒙 皇考宣宗成皇帝疊加簡任擢至正卿朕御極之初調任戶部尙書籌畫度支克盡厥職任勞任怨不爲習氣所染前因患病准其開缺調理方冀長承恩澤永享遐齡茲聞溘逝悼惜殊深著賞給陀羅經被派繼善帶領侍衛十員卽日前往奠

醢加恩贈太子太保銜照尙書例賜卹任內一切處分悉予開復  
應得卹典該衙門察例具奏伊子翰林院編修孫毓汶著賞給翰  
林院侍讀銜伊孫監生孫桐孫章均著賞給舉人准其一體會試  
用示朕篤眷耆臣至意尋予祭葬諡文定○諭僧格林沁奏遵旨  
查參天津失事大員一摺革職畱任副軍統領珠勒亨馬隊傷亡  
營盤不整刑部侍郎國瑞雖營盤未動惟未能上前援應各有應  
得之咎珠勒亨國瑞著交部分別嚴加議處已革副都統富勒敦  
泰統帶京營礮位駐紮北岸竟將礮位營盤全行失陷著卽拏問  
同已革提督張殿元總兵達年副將德魁一併押解來京交惠親  
王載垣端華會同刑部嚴行審訊按律定擬具奏直隸總督譚廷  
襄有統轄綠營之責據奏兵力足恃布置皆妥乃一經開仗卽失  
礮臺實屬督率無方並據僧格林沁查取國瑞等供是日該督坐

轎奔走尤爲恇怯無能大負委任譚廷襄著卽革任來京聽候查辦○諭海樸奏請試行椎布以裕經費一摺阿克蘇商販布匹著准其做照喀什噶爾分別徵稅卽歸併該處茶畜稅局辦理俟辦有成效再行具奏○以慶祺爲直隸總督由盛京將軍還未到任前以禮部尚書瑞麟署理○辛酉轉愛仁爲禮部左侍郎以文祥爲禮部右侍郎由內閣學士還○壬戌諭軍機大臣等英桂等奏擊勦亳州股匪獲勝並豫營馬步不能分撥一摺永城擒匪擊退後英桂等調派山西官兵一千名前往扼守並因亳州兵力較單復派遊擊承惠等兵協同朱連泰堵剿聲勢尙爲聯絡惟豫營兵勇旣據聲稱不過三千名分駐永亳鹿三處所存馬隊堪以進仗者不過一百餘所有袁甲三請調陝西官兵一千名並商撥馬隊助剿之處著毋庸議並著將不能分撥情形咨覆袁甲三辦理鹿亳爲歸陳屏蔽



該撫當嚴飭伊興額朱連泰等實力剿洗分投掃蕩毋令賊匪再有蔓延至前調之京營參將龍汝元遊擊何建鰲見因天津辦防緊要仍著該撫遵照前旨飭令迅赴僧格林沁軍營以資差委又片奏河南候補道周煦徵見辦軍需報銷局務驟難更易生手著准其畱於河南其勝保軍營糧臺並著英桂等知照該都統卽令候補道賈臻就近督辦將此由六百里諭令知之○諭福興奏衢州賊匪竄遁城圍已解一摺該逆麇聚郡城東南上月二十七等日因官軍疊次進攻賊膽頗寒遂於初五日丑刻率眾宵遁據福興奏稱已令李定太等分從東南兩路跟蹤追擊見在處州府城及縉雲等縣尙未克復儻令此股竄匪得與會合則賊氛並熾剿辦愈難措手著晏端書周天受卽飭李定太等探明此股逆賊見竄何處迅速督飭大隊實力追剿不得任其與處州等匪聯絡並

須嚴杜常山等處匪徒續行下竄以免蔓延至衢州雖已解嚴仍應防匪蹤回竄並著晏端書飭令該地方文武嚴密防堵毋稍疏懈將此由六百里各諭令知之○命河南巡撫英桂來京陛見○予錢忻和休致以文煜爲直隸布政使前江甯布政使○癸亥諭軍機大臣等昨因英桂等奏亳州剿匪獲勝諭令該撫卽飭伊興額等將此股匪眾速行掃蕩本日據袁甲三奏稱徐境捻匪漸就肅清卽日進攻宿南賊匪惟北路自亳州以至靈璧賊圩林立朱連泰兵力過單不敷剿辦請飭令德楞額與朱連泰合爲一軍將亳境捻巢迅速掃除等語亳州等處匪勢甚熾非痛加剿洗深虞延蔓德楞額見駐鹿邑藉杜該匪竄入豫境惟遠防不如近剿著英桂瑛榮卽飭該員統領所部赴亳與朱連泰兵勇聯絡聲勢協力攻剿務使亳境肅清卽以保固歸陳門戶不得株守鹿邑致以有用之

兵置之無用之地至袁甲三片奏伊興額所調察哈爾馬匹請仍  
畱北路以備援剿毋庸飭赴徐州等語察哈爾解京馬匹見據僧  
格林沁查明可以勻撥四百匹解往惟時值暑熱須俟八月初間  
起解一俟解到以後撥交伊興額軍營應用以資得力將此由六  
百里各諭令知之○諭袁甲三奏徐州兵勇日增餉稍匱乏請仍  
飭鄰省按月撥解一摺徐州軍餉前經諭令崇恩常績各先籌銀  
數萬兩協濟乃據稱奉旨後僅據山西解到銀三萬兩山東並未  
知照數目亦無起解信息見除徐營原存兵勇外又添有亳州正  
陽等營兵勇約其一萬餘名月需餉銀七萬餘兩其亳州正陽等  
營兵勇雖就近歸併徐州支應亦仍須由河南撥銀協濟徐屬屢  
遭兵燹進款愈絀而該郡軍情甚緊亟應寬爲籌備以固北路藩  
籬著崇恩恆福每月各撥餉二萬兩並著英桂瑛棨按月協濟銀

二萬兩均自本年六月爲始解交徐州糧臺應用卽或不能按月如數接濟務各先行籌撥銀數萬兩解往以濟急需將此由五百里各諭令知之○賞哲里木昭烏達兩盟官兵銀幣○甲子諭內閣晏端書奏衢州官軍疊次獲勝府城解圍一摺衢州圍撲城垣之賊經道員繆梓等約會進攻福興從沙灣一路督兵進剿總兵李定太復由壽昌統帶全隊行抵衢城六月初四日先以大隊攻其東路將賊營十一座一律焚毀餘匪四散奔竄府城解圍其竄踞武義縣城之賊經周天培從壽昌督兵回剿於六月初八日將縣城克復剿辦尙爲得手著晏端書周天受嚴飭各路鎮將跟蹤追剿分投掃蕩將失陷各城次第克復毋令蔓延所有在事出力員弁兵勇著有微勞准其擇尤保奏毋許冒濫○諭軍機大臣等勝保奏進剿懷鳳賊匪連獲勝仗並通籌緩急情形力攻懷遠一

搆逆匪竄踞懷鳳勢成犄角儻令日久負嵎則剿辦愈難措手惟張龔兩逆俱在懷城則首惡窩巢尤應亟爲拔去勝保見在移營新城口著卽由該處進攻懷遠再圖鳳陽務須迅掃逆氛毋任再有滋蔓昨據袁甲三奏稱徐屬漸就肅清卽日進駐宿州並擬派令馬隊與練總苗沛霖會哨以通南北聲息是該都統由南進逼袁甲三一軍亦卽自北而南旣成合圍之勢自無虞該匪再有竄逸該都統等諒能聯絡聲勢悉心辦理也將此由六百里諭令知之○乙丑諭內閣兵部奏遵議天津失事大員處分一摺革職畱任護軍統領珠勒亨著照部議卽行革任刑部左侍郎宗室國瑞著照部議降四級調用不准抵銷珠勒亨國瑞均著發往僧格林沁聽候差遣委用○諭軍機大臣等吳振械張亮基奏宣威曲靖剿辦回匪各情據稱東路業經就撫卽南路各寨亦均陸續投誠

勦辦日有起色張亮基已簡授雲南巡撫見患目病賞假兩月在任調理惟回務甫有端倪如假期限內卽已痊愈卽著銷假辦事本月諭令徐之銘護理滇撫篆務著該督等傳諭該臬司駐紮宣威以爲後路策應至桑春榮前因咨請該督代奏開缺諭令來京另候簡用茲據奏病勢日重難期速痊著卽飭令來京將此由六百里諭知吳振械張亮基並諭徐之銘知之○調靈桂爲刑部左侍郎以書元爲理藩院右侍郎

由左副都御史遷

○以徐之銘暫護雲南

巡撫○予雲南殉節知府鄧國煊祭葬世職建祠陣亡知府李嗣元等祭葬世職○丙寅諭軍機大臣等前因捻匪竄踞臨淮鳳陽北路緊要傳諭李孟羣與福濟商酌或仍赴臨淮或援應滁全俟北路稍定再圖舒桐茲據該藩司奏稱南路霍潛一帶賊蹤出沒無常見已約集馬步各兵赴霍山合剿並派副將盧又熊分攻舒

城已接仗數次等語。捻匪竄踞懷遠鳳陽，勢成犄角。勝保督兵先  
攻懷遠，袁甲三亦進駐宿州。此時情形是否，尙須李孟羣前往協  
剿。該藩司見在分攻霍山舒城，意在肅清南路。翁同書已補授安  
徽巡撫，南北兩路均應統籌兼顧。著與勝保悉心商酌，如懷鳳緊  
要，卽傳諭該藩司馳往協剿，歸勝保節制。其霍山舒城之賊，亦須  
派員接辦。毋令該匪窺伺六安爲廬州正陽後路之患。方爲妥善。  
將此由六百里諭知勝保，翁同書並傳諭李孟羣知之。○命山西  
大同鎮總兵官鞠殿華開缺，以提督候補。○丁卯諭軍機大臣等：  
王懿德、慶端奏統兵大員剿匪陣亡，見籌援剿一摺。前據該督等  
奏福建軍情緊急，請飭張運蘭、蕭啟江各軍赴援。當因張運蘭等  
已調往浙江，諭令福興將所帶兵勇二千五百名交耆齡會同周  
天受酌派得力將領帶赴浦城等處，協同攻剿。見在浦城政和各

路尙未克復趙印川復因堵禦麻沙逆匪力戰陣亡不特建陽危急卽建甯府城亦甚喫緊而浙省衢城解圍本日復據何桂清奏探聞常山開化江山等縣均已克復則浙省情形稍鬆自應分兵策應閩省福興卽日來京其所畱兵勇是否已赴閩境著王懿德等飛咨晏端書周天受等務卽催提迅往浦城等處與閩兵兩路夾擊庶可漸次掃除如果江山已復則衢防不必多兵李定太所帶兵勇亦可酌撥前往閩境協同攻剿趙印川帶兵素稱得力逮因軍挫陣亡殊堪憫惜著將被害情形查明請卹王懿德見因患病賞假兩月調理惟軍情緊急所有調度機宜仍著慶端與該督隨時商辦以期早靖賊氛將此由六百里諭令知之○諭本日據王懿德等奏趙印川在麻沙力戰陣亡建陽危急建甯府城賊氛逼近等語閩省將寡兵單且與浙江江南接壤江西撫建各屬漸



就肅清其敗竄之賊勢必闌入閩境見據何桂清奏探聞江山常山開化三縣先後克復周天培一軍復攻克武義永康二縣金華紹興解嚴是浙江軍情已鬆所有福興兵勇著晏端書耆齡周天受等迅卽派員統帶赴閩毋再延緩李定太一軍屢經克捷衢州與浦城相距甚近能令該總兵由江山移剿浦城與閩兵夾擊當可得力著晏端書周天受就近妥籌調撥此外江西各軍如可酌調並著耆齡察看情形毋分畛域調往協剿將此由六百里各諭令知之○諭扎拉芬奏續接俄夷來咨相機妥籌辦理一摺俄酋普提雅廷本年在天津海口所求五口通商業已允准其獲利甚厚又俄酋木哩斐岳幅至黑龍江勘地業經奕山如其所請與以空曠之地該夷甚爲感激普酋曾於天津許備槍礮由該國送來此次來文並不執議賠償僅以查看貨物商議完事爲詞總爲

中國優待之故可卽派委員與之議結毋庸再加辯駁諒彼必無  
啟釁之心天津黑龍江之事不必與之明言著照該將軍所議相  
機控馭咨照明誼妥辦可也○何桂清奏浙東軍務自李定太克  
復壽昌後卽進紮衢州甫三日而城圍已解江山常山開化三縣  
亦先後收復又據周天受稟督飭周天培於六月初八日克復武  
義永康二縣見在乘勝進攻縉雲宣平數日之間三衢肅清金華  
紹興各府亦已解嚴浙東既有轉機東南全局當可無虞報聞○  
馬秀儒以病免以羅遵殿爲湖北布政使莊受祺爲湖北按察使  
由荆宜  
施道遷○以捐輸軍餉再永廣陝西鄉試中額四名涇陽三原二  
縣學額各七名大荔六名渭南五名朝邑韓城郃陽各三名蒲城  
二名咸甯岐山盩厔三水各一名○予福建陣亡副將吉祥等江  
西瑞州陣亡知縣楊毓藻等祭葬世職○戊辰諭軍機大臣等瑞

麟奏籌款修築營盤設法捐輸並先借撥藩庫銀兩等語天津防堵事宜昨經諭令該署督趕緊辦理若專待捐款恐緩不濟急著准其在藩庫先撥銀三萬兩墊用惟工用尙多卽軍械及鎗丸火藥等需亦恐不少該省藩運各庫能否再行墊撥著瑞麟卽飭藩運兩司酌量籌畫儻庫款不敷卽著奏請部撥庫銀數萬兩以濟急需俟續捐得有成數再行撥還部庫如此一轉移閒所有應辦事宜不至遲緩至捐輸各員准其俟繳齊銀款奏請獎敘該署督先就見有款項相度地勢擇要興工安速辦理將此諭令知之○以慶端暫署閩浙總督瑞璜護福建巡撫由布政使護理○己巳諭內閣戶部奏查覈江南糧臺支銷數目請旨遵行一摺江南糧臺支放銀數溢於成案前因大軍直薄金陵指日可以得手降旨暫從優厚若日久遷延仍應覈減以節糜費見據何桂清奏金陵賊勢窮

蹙卽日可圖克復所有目前兵餉卽著仍遵前旨覈銷其四年閏  
七月部定章程以後至七年未奉諭旨以前報銷冊籍仍著按照  
銀米兼支章程覈算以符定例如有浮冒含混情弊卽著該部查  
明經手之員責令賠繳○諭晏端書奏浙江軍務總統需員當降  
旨將周天受賞加提督銜督辦浙江防剿事宜茲據張芾奏稱周  
天受調度乖方縱兵騷擾在湯谿蘭谿等處沿途焚掠並有擅殺  
鄉團指爲通賊情事似此漫無紀律本應從嚴懲辦姑念武義永  
康次第收復該員尙有微勞著從寬先行革去提督銜毋庸總統  
浙江軍務仍責令帶兵剿賊以觀後效張芾曾經奏保周天受赴  
浙統軍旣經自行檢舉並著交部議處見在金衢嚴各屬失陷地  
方均已先後克復儻有不肖兵勇於賊去之後借端挾括財物甚  
至焚毀城市村莊帶兵將弁不能約束者一經參奏朕必按律嚴

懲決不寬貸將此通諭知之○諭晏端書奏官軍連克縣城一摺  
逆匪竄踞浙江武義等縣周天受調派各軍分路鈔擊將賊卡一  
律焚毀六月初七日周天培親督諸軍直逼城根王恩榮等攻南  
門榮陞等攻西門初八日子時卽將武義縣城克復救出難民二  
千餘人永康賊匪經和春派令副將陳開選一軍會剿連焚賊壘  
三座殲斃數百名縣城於初八日午時克復救出難民一千餘人  
至衢州解圍以後李定太等卽派知縣丁竣等進攻常山副將陶  
茂森等進攻江山候選道李元度亦由屏風關進兵會攻常山江  
山縣城亦卽收復開化之賊經總兵秦如虎督令已革遊擊夏寶  
慶等進攻賊眾聞風潛逃當卽收復縣城此股賊匪分踞各縣經  
官軍分投剿辦數日之內連復五城辦理尙爲安速所有在事出  
力員弁兵勇著晏端書擇尤酌保毋許冒濫○諭自軍興以來諭

令各省紳士督辦勸捐原爲集貲助餉卽以保衛鄉閭全在督辦之員以身倡率則地方紳富自知觀感前任江南河道總督潘錫恩以在籍大員奉旨督辦捐務國防並辦理糧臺宜如何激發天良維持大局茲據張芾奏稱該員坐擁厚貲心存慳吝聞警則先期逃遁近更託病藏匿以致甯國各屬皆藉口於涇縣涇縣各戶復藉口於該員實屬喪心昧良大負委任潘錫恩著卽革職仍著何桂清飭令督辦勸捐事宜以觀後效儻再遷延推諉漠不關心卽著該督嚴參治罪○諭軍機大臣等張芾奏總統大員不能勝任請飭查辦一摺並請將守城出力及防守貽誤各員分別賞罰等語總兵周天受經朕特加提督銜總統浙江軍務應如何力圖報稱若如張芾所奏該總兵自樟樹潭三次獲勝遽行驕恣種種貽誤並縱容所部兵丁肆行搶掠又於庸懦失機之已革遊擊楊

國正未能嚴行參辦實屬大負委任除本日已降旨將周天受革去提督銜已革遊擊楊國正先已有旨拏問交晏端書嚴審治罪外至該總兵於全旺餘嶺等處如何疏於防堵以致賊蹤蔓延處州縉雲其進攻武義永康如何遷延何以指金華鄉團爲通賊遞行捕殺至數十名之多何以兵勇到處殺掠毫無聞見其於楊國正是否有心袒護均著和春何桂清確切查明嚴行參辦至參將胡定國赴援廣豐守禦出力遊擊田應科等派防開化綢巾街肆行滋擾賊至卽潰各情並著查明具奏分別懲獎又張芾奏在籍河督潘錫恩慳吝性成首先抗捐以致紳富效尤並藉口老病於辦團等事遊匿不出請責令倡捐餉銀數十萬兩並將糧臺遺失餉械責令賠償等語本日已明降諭旨將潘錫恩革職並令何桂清飭令該革員督辦勸捐事宜至該革員係奉旨督辦團防總辦

糧臺之員六年三月間賊陷甯國團練星散餉米軍械悉行遺失豈能辭咎儻能毀家紆難卽捐餉銀數十萬兩以贖前愆尙可寬其既往如敢仍前鄙吝致徼甯各戶皆有所藉口貽誤捐輸大局卽著何桂清將該革員從前遺失餉械分晰查明責令悉數賠償並將如何治罪之處定擬請旨毋稍寬縱張芾摺片三件著鈔給和春何桂清分別閱看將此由六百里各諭令知之○諭張芾奏已革遊擊縱兵擾民統兵大員袒護保畱各等語據稱已革遊擊楊國正在江山一帶搶掠鋪戶奸擄婦女與團丁互鬪以致縣城失事明安泰路出龍游兵多淫掠周天受兵過湯溪占房焚屋金華鄉團以兵勇奪牛赴營具控周天受輒行捕殺數十人指爲通賊並欲將楊國正保畱錄用等語楊國正先經晏端書以帶兵退避參奏並未將其擾民激變之處聲敘迨經奉有諭旨革職拏問



何以任其逗留軍營到處騷擾龍游湯溪距省較近晏端書豈無聞見何以不聞參劾總由平日意存見好以致帶兵將領任聽兵勇擾害地方毫無顧忌著晏端書仍遵前旨卽行提省嚴審並將縱兵殃民各情一併嚴切根究此等滋事兵勇該撫一有所聞卽當嚴飭將弁正法數人以儆其餘如有袒護之員卽行從嚴參劾自然畏法斂迹不至相率效尤此時自無從逐一根查嗣後該撫如聞各營再有不遵軍律騷擾鄉民者卽派大員持令前往會同帶兵之員將滋事兵勇以軍法從事毋得一味姑容自干重咎將此由六百里諭令知之○命浙江衢州鎮總兵官李定太幫辦欽差大臣和春軍務總辦浙江剿匪事宜○以候補三品京堂許乃釗爲光祿寺卿○予浙江松陽等縣殉難知縣張士超等祭葬世職○辛未諭軍機大臣等和春等奏傳振邦見駐灣沚未能前赴

徐州等語徐州擒匪雖經袁甲三等擊退而宿毫一帶匪勢踴張  
必得勇幹大員前往督辦署徐州鎮總兵史榮椿已簡放直隸提  
督卽應前赴新任傳振邦著仍遵前旨酌帶兵勇卽回徐州本任  
會同伊興額督兵進剿毋稍遲緩所有灣沚堵剿事宜著和春何  
桂清會商另派得力大員駐紮該處幫同邵紹良妥爲辦理將此  
由六百里各諭令知之○諭據路秉章奏胡興仁未經戰陣所請  
隨帶伊弟胡景陶及募勇帶往浙江之處可否停止等語前降旨  
令新授甘肅布政使胡興仁馳往浙江會同會國藩辦理軍務該  
藩司到浙後朕尙有任用之處原非專爲辦理軍務起見連日據  
何桂清晏端書和春等奏報浙省衢州城圍已解所有失陷各縣  
城亦均次第克復見止處州尙爲賊踞温州亦有賊蹤會國藩到  
浙後定能迅速掃蕩原可不藉胡興仁爲之襄辦至該藩司之弟

守備胡景陶既據該撫奏稱並非軍營出色之員卽著令其毋庸  
前往浙江所有募勇數十人酌帶赴浙之處亦毋庸議將此由五  
百里諭令知之○諭德勒克多爾濟等奏俄羅斯署理固畢爾那  
托爾斐耶多羅斐志咨文內稱請停止驛站供給盤費羊隻之處  
請旨斥駁一摺俄羅斯固畢爾那托爾呈請停止兩國使臣往來  
驛站供給盤費羊隻實與舊例不符著德勒克多爾濟等咨覆時  
卽稱本貝子業經奏奉大皇帝諭旨中外相交一切事宜均有定  
例不可率行更易一旦停止供給物件亦非柔遠之意況驛站羊  
隻物件所費無幾亦無苦累之處等因曉諭知之○辦理浙江軍  
務前任兵部侍郎曾國藩奏報啟程日期擬由水路至九江登陸  
遄抵河口大營得旨汝此次奉命卽行足徵關心大局忠勇可尙  
俟抵營後迅將如何布置進剿機宜由驛馳奏可也○和春奏查

南門雨花臺爲城中賊匪出入要路屢次衝撲皆從此分股而來張國樑因移大礮數尊於臺之左右各營不時轟擊遙見臺中屋瓦皆飛該逆屯紮不住見已避至臺後兩面添築高牆直達南門城根竄伏不出其東北各門之賊亦皆藏匿惟西北隅三山一帶濱臨大江爲水上接濟必由之路自上下兩關以迄七里壽德等洲尙有逆營數處互相應援來往賊船無不取道於此五月二十九日水師遊擊賴鎮海見壽德洲竄出賊船數隻窺我水營另有數船駛赴北岸探尋路徑意在乘虛外竄當卽飭令三板各船協力兜拏水勇由北岸溯流合剿斃賊數十名餘悉遁回下關六月初八日探報上游賊黨裝載米糧油鹽等物接濟金陵當飭舟師分投迎截是夜三鼓見大號逆船數隻順流下竄都司盧起升等督駕長龍快船前後包鈔殺賊百餘名奪獲旗械米石雜物甚

多其七里洲一帶賊船每乘風雨月黑之夜潛蹤外竄均卽隨時擊退近處接濟見又漸次肅清矣惟沿江賊壘自蕪湖太平直達繁昌銅陵以上南北兩岸分屯密布遙爲金陵聲援洪逆被圍情急屢以血書求援而上游逆黨又緣官兵恢復九江紛紛下竄其屯聚之處大率以蕪湖繁昌爲巢穴而分踞奎潭石峴峨橋等處往來撲擾飄忽靡常五月十二日李德麟挑選奮勇隊伍分路登岸潛赴賊營左右埋伏親督師船黃夜駛近神塘開礮轟擊該逆錯愕自相踐踏殲殪六七百名餘皆回竄當將賊壘二座踏毀其南岸繁昌石峴股匪竄踞峨橋五月十五十九等日糾合醜類撲犯水營遊擊李起高郭定猷等整列排槍連環遞進將賊隊橫衝數段賊始驚竄逐北二十餘里二十二日郭定猷等會擣峨橋逆壘奎潭石峴等處各出悍賊數千並有賊船四十餘隻圍撲艇船

以圖牽掣我軍水陸追剿往還數次擊沈賊划四隻砍取首級百餘顆援匪各鳥獸散二十四日鴉山峨橋各路悍匪數千直撲龜港水營我軍設伏馬步橋俟賊隊逼近伏兵齊起槍礮環轟該逆跟蹌奔潰追殺十餘里殲匪二百餘名六月初二日吳全美督飭舟師會同李德麟所部由魯港規取峨橋分兩翼並進轟擊逾時以逆壘高堅未能猝拔探聞石峴股匪製造礮划火箠意圖大逞當檄皖南道鄧瀛就近派兵助剿仍飭該鎮等協力巡防廓清江面又奏安徽壽春鎮總兵鄭魁士前奉諭旨由廬州前赴江南軍營助剿茲該總兵帶同遊擊朱景山等並隨營文武數員親軍百餘名於六月初一日到營查江南軍營鎮將調赴浙江不少見在圍剿正值喫緊而地方遼闊紮營之處均極險要必須得力大員督率防剿方能周密該總兵勇敢善戰所有紫金山一帶官軍應

責令統帶以期得力均報聞○壬申諭內閣已革直隸總督譚廷襄防堵海口不能實力抵禦以致礮臺失陷夷船駛入內河前據僧格林沁查參業經降旨飭令來京聽候查辦著派惠親王載垣端華會同刑部訊明失事退避各情按律定擬具奏○諭晏端書官軍收復緡雲宣平縣城一摺浙江永康武義餘匪分竄緡雲宣平周天受派令副將陳開選等分路進剿陳開選督同遊擊吳再升移師進逼緡雲沿途焚燒賊壘擒斬逆匪不可數計於六月初九日將縣城收復總兵周天培督攻宣平親率諸軍四面兜圍斃賊無算於六月初十日收復城池浙江被陷各縣次第攻克著李定太督率將弁進攻處州等處迅圖克復毋稍遲延所有此次出力員弁兵勇准其彙案請獎○賞刑部員外郎段承實五品卿銜命馳往上海幫辦稅則事宜○是月緩徵山西歸化等三十一廳

州縣暨仁壽等四縣丞所屬被擾地方新舊額賦蠲免貴州都勻等四府獨山等十六州縣及清江等三通判並錦屏鄉縣丞所屬被擾地方額賦

秋七月甲戌奕山等奏黑龍江左岸舊居屯戶外空曠地方許俄人存住並江中准其行走已非興安嶺舊界乃該國闖越黑河口欲由松花江西上夷字內又寫烏蘇里河至海爲中國與該國同管之地肆意侵占漫無限制並在烏蘇里右岸圖勒密山向西安設礮臺並欲在河內上下左右岸至牯牛河一帶蓋房修道見派副都統富隆額圖欽帶同佐領三隆親赴綏芬烏蘇里等處履勘奏入 上諭奕山景瀄飭該副都統等細心體察除黑龍江左岸業經奕山允許其吉林地方景瀄尙待查勘本不在奕山允許之列當以何處爲界卽著該將軍等據理曉諭嚴行拒絕○乙亥



諭軍機大臣等勝保奏請飭英桂將前調陝西官兵速令赴營等語英桂所帶兵勇爲數無多分駐永毫鹿三處以防歸陳各路袁甲三曾調陝西官兵一千名業經英桂詳細具奏不能分撥所有勝保奏請飭調之處著毋庸議惟見在懷遠鳳陽捻勢鴟張勝保軍營兵勇實有應接不暇之勢臨淮一帶必須有統兵大員與勝保聲勢聯絡合力攻剿方爲妥善袁甲三前奏徐屬漸就肅清卽日進駐宿州卽著統帶官軍節節前進與勝保會合毋稍延誤史榮椿已補授直隸提督應令前赴新任已諭和春飭令傅振邦酌帶兵勇卽回徐州本任所有該處餘捻卽可責成該總兵與伊興額防剿袁甲三如能進紮臨淮扼守東路則盱眙天長等處不至喫重而勝保亦得專力攻剿懷遠規取鳳陽不令該匪久踞復有蔓延其李兆受投誠一節著勝保察其誠僞酌量辦理將此由六

百里各諭令知之○諭前因浙江江山等縣已先後克復福建賊氛日熾諭令晏端書周天受等迅卽派員將福興所有兵勇帶赴閩省援剿尙未據該撫等覆奏見已改派李定太總統浙江諸軍如福興原帶兵勇尙未赴閩著晏端書會同李定太卽派得力大員統帶前往毋再延緩閩省帶兵之道員趙印川最爲得力茲已陣亡情形最爲喫重必得浙兵趕緊前往與閩軍會合夾擊勿令賊勢蔓延所有赴閩之兵是否應由仙霞嶺至浦城抑由處州至政和松谿等處著晏端書李定太酌度情形相機辦理至李定太旣膺總統之任自應分投策應不當株守衢州饒廷選雖因失事革職究係久歷行陣堪以畱防衢城毋稍疏懈將此由六百里各諭令知之○以李孟羣暫署安徽巡撫由布政使署○丁丑諭內閣軍機大臣會同兵部等衙門奏遵議法福禮等條陳回疆善後事宜

一摺喀什噶爾地處極邊自參贊大臣移紮葉爾羌後該城領隊大臣例不能專發奏報設有緩急轉達需時自應量爲變通以資彈壓著照所議喀什噶爾領隊大臣著改爲辦事大臣所有本城應咨事件仍與幫辦領隊大臣之換防總兵聯銜咨呈參贊大臣查覈遇有邊警准其專摺馳奏其行文各城悉用咨行與東四城一律仍歸葉爾羌參贊大臣統轄以符定制至該城六品以下伯克以別城人員補授每多不治輿情亦著准其專補本城人員其阿斯圖阿爾吐什莊五品阿奇木伯克著改爲四品並准於該處回城內復設回兵七百名將舊給挖銅回子地一萬四千畝給與以充糧餉仍舊設管轄回兵四品伯克二員以專責成所有昌巴爾山銅廠卽行永遠封禁仍照議徵收布稅以抵銅廠稅課嗣後該大臣等務當詳慎舉劾嚴密巡查勤練兵丁妥籌經費以期變

通經久永靖邊隅○諭晏端書奏克復處州府城一摺自縉雲宣平克復後各路悍賊盡竄處州周天培等由縉雲進攻處州六月十三日先將桃花嶺之賊擊退卽由荆坑出嶺移營直逼郡城周天受復調瞿先仲等軍進紮永康復知照溫處道俞樹風等軍從海口進攻並密令勇士潛伏城中縱火十五日夜見城中火起卽分隊而進斬獲甚多逆眾亂竄出城奔往松陽一路遂於十六日克復府城剿辦尙爲得手著晏端書李定太嚴飭在事將弁將逃竄各匪分路埽蕩務令浙境一律肅清毋稍延緩○諭慶端奏出力鄉團請准隨時酌保等語自軍興以來疊經降旨凡有鄉團民勇保衛鄉閭殺賊立功者准各省督撫奏請優獎近年各路帶兵大臣及督撫等陸續奏請獎勵均經立沛恩施卽如福建省上年被賊竄擾各屬團勇戰守出力經王懿德保奏業經給予獎敘特

恐其中不無遺漏之人除此次慶端等補行請獎外如尚有漏未請獎之員著卽查明補給獎勵至見在建甯一帶賊蹤逼近該紳民等有能團練殺賊保衛地方者著該署督隨時奏獎毋稍稽延並卽出示曉諭俾紳民人等同心敵愾以收眾志成城之效○諭軍機大臣等浙江處州府城已復而松陽雲和等處尙未肅清江山遂昌各路須防回竄且恐其竄入溫郡與閩省賊匪通連尤難收拾晏端書惟當會同李定太嚴飭各軍分路截剿肅清浙境不可專顧一處致令再有延蔓至福興所部兵在衢州者尙有二千五百名屢諭晏端書等派員管帶赴閩援剿見在建陽又陷建郡危急而本日據晏端書奏此項官兵已飭回駐玉山暫歸李元度管領或畱江西或援閩省仍由江西巡撫酌辦如周天受接奉諭旨業已派員統帶赴閩應毋庸議等語閩省需兵甚急著齡迅

即查明福興原帶兵勇如果尙未赴閩即派得力大員統帶前往毋再延緩再據福興奏傷重未能赴閩請飭先派一軍赴浦城一帶與處州得勝之師夾擊或即令防守江山之兵就近進攻浦城以剿爲防稍分賊勢各等語並著晏端書會同李定太酌量情形相機辦理將此由六百里各諭令知之○諭據慶端等奏閩省上游賊勢鴟張兵力單薄請添調楚省官兵一摺福建省頻年兵力已成積疲之勢近日江西竄往之賊愈見蔓延得力大員如趙卬川等又復先後陣亡誠非生力勁軍不能制勝該署督指調之副將銜參將石清吉遊擊張萬祿守備田聯升及其所部兵勇是否見在湖北著官文胡林翼查明該員等儻可抽撥即飭該員等各帶勁旅迅速赴閩交慶端調度毋稍遲延將此由六百里諭令知之○諭慶端奏賊勢猖獗出省督剿並請調楚兵楚餉各摺片建

陽縣城失守建甯危急該署督既經親往延平督剿自當速籌進  
取先杜其分竄之路方能力固藩籬見在浙江處州已報克復前  
調福興所帶見在衢州之官兵二千五百名飭令赴援閩省業經  
晏端書飭令先回玉山本日已諭知耆齡與李定太就近商派得  
力將弁統帶赴閩儻能由浦城一路轉戰而前即可與閩兵前後  
夾擊該署督所帶兵勇無多前調之漳州雲霄等兵卽著飛催務  
當嚴明賞罰統帶得人不可任其延玩所請調湖北官兵並參將  
石清吉等已有旨諭令官文胡林翼酌量派撥其所請餉銀湖北  
省見在供支東征水陸各軍每月尙須鄰省協撥勢不能分解二  
十萬兩之多已令戶部速籌有著之款指省撥解協濟矣建陽縣  
文武下落並著查明具奏將此由六百里諭令知之○王茂蔭以  
病免以萬青藜爲兵部左侍郎調李維翰署刑部右侍郎命陳孚

恩以頭品頂帶署兵部右侍郎

服闋尚書

○予陣亡縣丞姚鳳長祭葬

世職○辛巳諭軍機大臣等僧格林沁西凌阿奏催辦礮臺營壘擬移營雙港一摺見在購辦椿木解赴天津修整礮臺營壘並搬運礮位辦理漸有頭緒該大臣可先赴天津查看雙港營壘礮臺布置周妥後可仍回通州駐紮不必常駐天津如有應行辦理之處不難隨時前往總以通州後路爲要僧格林沁赴津後通州營壘礮位卽交副都統克興阿暫爲照料應調官兵卽照所擬辦理再前任漕運總督李湘棻曾在僧格林沁軍營其人是否堪以調赴軍營藉資驅策著查明具奏將此諭令知之○諭見在天津修造礮臺需用牛皮包裹以避火攻據僧格林沁奏張家口購買皮張較易著慶昫卽飭該監督崇連趕緊購辦牛皮一千張迅卽派員解赴天津以應要需將此諭知慶昫並傳諭張家口監督崇連



知之○壬午諭內閣前因張芾奏參周天受在浙江調度乖方縱兵騷擾當經降旨將該總兵革去提督銜毋庸總統浙江軍務茲據晏端書奏周天受帶兵援浙以來並無遷延貽誤並另片奏松陽縣城亦經克復等語周天受被參各款雖據該撫奏係傳聞異詞然其在金華湯溪致令兵民互相鬪殺亦不得謂無罪惟念該員疊次收復各城著有勞績仍責令奮勉圖功俟浙江全境肅清後著和春據實保奏候朕施恩○諭曾望顏奏陝西省州縣於竊盜各案必令事主出具是竊非強是搶非劫各甘結請旨永遠革除等語各省州縣諱盜爲竊定例綦嚴何以陝西省州縣於事主呈報之初賊犯未獲卽責令出具並非強劫各結豫爲諱匿地步此風斷不可長著曾望顏嚴飭各州縣卽將前項甘結永遠革除儻狃於積習不知悛改卽著照諱盜例從嚴參辦以示懲儆○諭

恆福奏三河口鹽務總局請仍用委員辦理一摺陝西省行銷河東鹽引前經王慶雲派委候補府經歷衛啟傳駐紮陝西華陰縣屬之三河口專司其事奏請給予運判銜並聲明試辦一年後應設何官再行議奏茲據恆福奏稱該委員試辦以來費省事集商販相安足以裕課便民著卽毋庸另議設官嗣後該局鹽務准其卽用委員辦理並定爲三年一換以專責成此次該委員衛啟傳在局二年著有成效著准其再畱一年如果始終奮勉再行奏請獎勵以後接辦之員報滿時果能出力卽查照蒲灘章程酌量請獎如有玩忽誤公之員卽著隨時撤參以重鹺務而示勸懲○諭前據李鈞崇恩奏豫籌明年分成河運事宜當經降旨以全漕河運能否照辦諭令籌商具奏茲據奏稱籌款挑河設法趲運並將應修各工擇要估辦著照所議卽飭藩運二司將挑河例價津貼

銀兩趕緊籌備支發以免臨時遲誤李鈞等卽飭該地方官認真挑挖務使河身一律深通輓運無阻並將應辦各工需用錢糧撙節估計先行具奏毋許任聽屬員藉端浮冒以重帑項而歸覈實○諭軍機大臣等本日據晏端書奏衢州尙有福興所帶兵勇擬令副將張騰蛟統領隨同饒廷選從江山赴浦城等語浙省賊氛雖已漸次掃蕩而衢州玉山等要隘尙須畱兵防守以杜賊匪回竄李定太已派副將陶茂森等紮營大竿嶺並派九江等營各兵以爲後路衢州當可無虞饒廷選已開復總兵著卽帶漳兵漳勇福勇馳往浦城等處援剿見在浙江已克松陽餘匪竄往龍泉著周天受卽由龍泉取道進剿毋令匪勢蔓延其松陽克復情形仍著該撫查明具奏將此由六百里各諭令知之○以浙江衢嚴各屬肅清復已革總兵官饒廷選職○癸未諭軍機大臣等本日據

和春何桂清等奏浙省軍務將竣請飭曾國藩將援浙之師改道  
援閩一摺所籌甚合機宜福建地勢西接江西北鄰浙江若令賊  
勢蔓延所關非淺已諭曾國藩迅由鉛山直擣崇安著晏端書迅  
飭饒廷選帶漳福各兵勇馳往浦城等處援剿其周天培所帶援  
浙兵勇內竝著挑選精銳三千餘名由龍泉一帶赴閩與饒廷選  
會擣浦城慶端見已出省近駐延平督辦著該署督飛飭在建甯  
帶兵之保泰等迅速上剿爲三路夾攻之計周天培一軍業據和  
春等奏稱由江蘇月撥銀二萬兩解往該總兵軍營援兵未到之  
時慶端仍當就本省兵力督飭在事文武實力堵剿毋許延緩再  
據福興奏所帶援浙一軍衛圍已解其出力各員弁請由晏端書  
彙覈請獎等語著該撫確查擇尤保奏毋稍冒濫將此由六百里  
各諭令知之○諭前因浙江軍務緊急諭令曾國藩赴浙剿辦見

在衢州業已解圍處州等府縣亦相繼克復境內餘匪不難剋日肅清惟閩省浦城崇安建陽松溪政和等處賊勢蔓延亟應趕緊勦辦曾國藩業已奏報啟程著卽以援浙之師由江西鉛山直擣崇安相機進剿迅將閩省各匪一律掃除毋稍延誤曾國藩赴閩援剿所需軍餉著官文等仍遵前旨由湖南湖北按月籌銀各二萬兩解赴曾國藩軍營以資接濟將此由六百里各諭令知之○乙酉諭內閣楊載福奏官軍進攻樅陽等處獲勝竝分兵收復建德縣城各摺片六月十一日楊載福統帶官兵駛過安慶派令王明山等進攻樅陽將所有賊船焚毀淨盡斃賊甚多十二日楊載福親督官軍進攻大通何瑞祥等登岸攻擊賊眾力不能支棄壘奔竄都司宋美富派令哨弁王金楷等帶領舢板與投誠商民張大忠合攻建德縣城將兩岸竹筏燒毀無餘官軍水陸夾攻該匪

等乘夜出城逃逸當將縣城收復其進攻銅陵樅陽陣亡之儘先都司李洪勝外委盛大發汪山友劉升泰著交部從優議卹○諭軍機大臣等袁甲三奏進剿宿南賊匪獲勝竝請調豫省官兵助剿各一摺宿南賊匪疊被官軍攻剿得勝湖溝集以南復經招集團練添築民圩九處與南路官軍聲息已通見在伊興額由西南路進剿滕家勝等進扼固鎮等處竝派兵分剿南平孫疇等處游匪自應乘此聲威迅速前進著一面飛催豫兵一面就見有各軍督飭剿辦竝諭知本處紳民悉心開導爲剿撫兼施之計務將宿南一帶剋日肅清以便會攻懷鳳不得以等候豫兵轉形株守至總兵傅振邦已諭知和春等仍令赴徐一俟該鎮到後史榮椿著卽來京無再遲緩將此由六百里諭令知之○諭本日據袁甲三奏兵勇不敷分布請飭調陝兵一千名迅赴該營協剿一摺此項

陝西官兵屢經勝保袁甲三奏調據英桂覆稱分駐亳鹿防剿歸陳不能分撥見在袁甲三已進兵宿南自宿州至懷遠道路已通即可與勝保會合惟自漕河以南五百餘里賊蹤分竄兵勇不敷分布自應亟籌添調著瑛棨酌量情形如鹿邑等處賊情亦緊卽於本省防兵內挑選一千名前往該處接替所有陝西兵一千名著卽飭令迅赴袁甲三軍營以資攻剿至鹿毫一帶防堵需人該署撫卽飭邱聯恩酌帶本鎮官兵馳往以剿爲防如邱聯恩另有防剿之處不能前往朱連泰見在亳州堪資防守竝飭與袁甲三聯絡聲勢俾得迅速前進掃蕩捻氛毋稍延緩將此由六百里諭令知之○丙戌諭內閣惠親王等會同刑部奏遵旨訊明天津海口失事各員分別按律定擬一摺已革直隸提督張殿元署天津鎮總兵達年護理大沽協副將遊擊德魁經譚廷襄派令分守大

沽南北岸礮臺已革副都統富勒敦泰於于家堡安營爲張殿元等後路援應當夷人開礮之時雖均極力抵禦擊傷夷船四隻轟斃夷兵多名惟礮位礮臺均經失陷實屬咎無可辭富勒敦泰張殿元達年德魁均依擬應斬著監候秋後處決已革直隸總督譚廷襄訊無畏蒞退避情事惟調度無方亦難辭咎著發往軍臺效力贖罪另片奏署直隸總督瑞麟單開隨營文員應否議處請飭吏部辦理等語海口在事武職各員均已參辦所有隨營文職永定河道崇厚等著吏部分別議處○諭吏部奏遵議山西巡撫恆福等請停增附捐教一摺據稱捐例變通原屬權宜之計請俟軍務告竣再行停止等語教職有考課士子之責增附生捐教前經停止嗣因戶部奏請暫爲變通究不足以示矜式所有增貢附貢報捐教職一條仍著停止以重學校而勵真才○諭軍機大臣等



據勝保奏軍務緊要馬隊得力請飭於綏遠城察哈爾挑選四五百名來營等語綏遠城在通州者已有一千恐難再調其所需察哈爾馬隊尙可酌量分撥著僧格林沁於見在通州之一千名內分撥五百名派員管帶前赴勝保軍營以資得力至伊興額前請撥察哈爾馬五百匹據僧格林沁覆奏可以勻撥四百匹因天氣炎暑暫停起解見在勝保軍營亦尙缺馬此項馬匹著卽隨同此起馬隊一併解交勝保俾與伊興額均勻撥用津郡防務緊要如果存兵尙形單弱竝著僧格林沁酌量情形飛咨察哈爾都統再行挑選馬隊五百名赴通補足原數將此諭令知之○諭勝保奏親赴鳳臨扼賊東竄竝請飭袁甲三進扼淮河北岸一摺昨據袁甲三奏稱由宿州至懷遠道路已通已有旨諭令迅速前進會攻懷鳳矣勝保因懷遠賊勢漸蹙恐其被偪東竄欲親赴鳳臨一帶

督率布置竝就近將李兆受一股相機招撫自係爲全淮大局起見除招撫李兆受一節已於另片內批示其由鳳陽東竄之路卽著勝保前往布置臨淮水路既有賊船下駛尤應實力堵禦以固清江門戶袁甲三接奉前旨諒亦剋日進兵著卽與勝保合兵會勦務由淮河北岸節節進攻使該匪不至南趨定遠東擾盱眙以免日久延蔓將此由六百里各諭令知之○勝保奏見據獲匪供稱捻首張濬分遣奸細潛赴紅心驛店埠定遠等處探聽官兵虛實欲攻定遠竝遣人勾結滁州髮賊前來會攻等情是東路情形十分喫重見在塔思哈移兵關山未能前進黃元吉一軍勢成孤立斷難奮擊大股竄匪雖派遊擊唐玉輝駐軍鳳陽但亦不能兼顧東南各處李孟羣見紮店埠臣卽飭調未卜能否前來且恐緩不濟急臣若不卽日繞赴鳳臨先爲布置不但廬州後路梗塞堪

虞且恐全滁鳳臨髮捻又成一片糾合滋蔓江北大局收拾更難  
李兆受一股兇燄尙熾查其所領二十四軍每軍實有二千五百  
人以二十四軍計之眾已數萬賊中推爲勁卒前擾江浦卽其餘  
黨見又爲髮逆所偪竄踞全滁勢極浩大臣若徒以力爭恐難遽  
操勝算幸經臣前次設法羈縻故兆受頓格頑梗之心見欲輸誠  
納款查其稟中所稱先獻滁州後圖他策若能盡如所言則其黨  
數萬不爲我敵轉爲我用卽粵逆之勢愈孤捻逆之氣亦奪淮南  
皖北指顧肅清是李兆受之向背實爲全局之轉關臣仰仗 皇  
上德威平日虛聲尙爲李兆受所震懾又以全家被獲概未加誅  
感戴之忱浹於肌髓而其前次旋撫旋叛戕及大員雖經屢次明  
白開示究覺負罪甚大疑畏難消必須臣親往招撫開誠布公坦  
白相示庶幾釋其疑貳堅其嚮往李兆受若果納土抒誠率眾助

勦臣當臨時酌度而行或先優給頂帶示以寵榮俾知我皇上

仁施法外准予自新但能立功贖罪上答高深必不追理前愆兼

可策其後效統俟臣到日相機籌辦得旨招降李兆受一事固應

示以坦白尤須倍加防範○福連卒以王庭蘭爲貴州按察使補候

三品京堂○戊子諭軍機大臣等前有旨諭知瑛榮令將畱防鹿邑之

陝西兵一千名派赴袁甲三軍營另調本省防兵一千名往鹿邑

接替竝令酌派邱聯恩前赴鹿毫一帶協剿仍令朱連泰與袁甲

三互相聯絡本日據英桂瑛榮奏歸毫等處剿匪情形據稱已派

遊擊承惠帶兵勇千名前往會同朱連泰防剿鹿毫兩營軍威已

壯其永城等處復有山西官兵協同防剿是豫境雖間有賊蹤多

係零星小股見在鳳臨懷宿匪勢披猖幾欲沿淮下竄其情形倍

形喫緊著瑛榮仍遵前旨速將陝西兵一千名派赴袁甲三軍營

毋再截畱致誤清淮全局仍再抽撥本省防兵一千名前往以補陝兵之數至邱聯恩前在光商等處防堵此時楚豫邊界業已肅清該總兵是否尙在該處若令移赴歸毫交界堪資得力竝著瑛棨飭令酌帶本鎮官兵卽行前往該總兵到後朱連泰卽可接應袁甲三俾得迅速前進卽邱聯恩不克分身亦當飭知朱連泰與淮北各軍聲勢聯絡毋任隔絕將此由六百里諭令知之○己丑諭軍機大臣等羅惇衍等奏遵旨聽督臣議撫俟夷務平定請移練勇防剿西北兩江竝片奏西江股匪竄至封川各等語羅惇衍等接奉兩次諭旨已傳諭各營不復進攻惟該夷淫掠焚燒依然如故竝欲進剿東北兩路村莊如果肆意騷擾自應激勵團練竭力保護毋令人心解體至通商雖有定議而該夷一時未卽將省城交出著羅惇衍等先與黃宗漢籌商將各團分撥西北兩江助

勦毋令坐糜兵餉至西江股匪於梧州收復後竄至封川開建德慶高要廣甯四會六縣交界地方賊勢蔓延亟宜趕緊撲滅何以未據黃宗漢奏報見在粵省夷務固應妥爲籌辦而西江匪徒出沒無常係地方緊要事件該督惟當督飭在事文武迅速勦捕並將見辦情形隨時具奏毋得仍蹈前轍遲延貽誤將此由六百里各密諭知之○諭僧格林沁奏遵旨籌撥官兵馬匹一摺察哈爾兵丁旣於南方水土不宜所有勝保軍營需用官兵著照所請先將在津屯紮之綏遠城馬隊內咨令托明阿勻撥五百名竝令揀選三百名配用臚壯馬匹先行派員管帶啟程其餘二百名俟領到南苑馬匹再行前進至僧格林沁請在南苑捐輸馬內挑選八百匹交綏遠城領馬官兵管解分交勝保伊興額兩路軍營各四百匹之處已諭令上駟院迅速挑選矣僧格林沁見已移營赴津

如果兵力不敷著卽奏請調撥將此諭令知之○庚寅諭軍機大臣等恩慶奏裏塘夷匪滋事土司喇嘛挾憤撤站見籌安撫一摺裏塘喇嘛因爭充副堪布一缺糾約夷眾搶掠本與臺站無涉該土司喇嘛何得遽行撤站以致道途梗阻見經王慶雲疊次派員前往開導自當令其迅速安站以弭釁端惟該處距川較遠王慶雲所派委員仍當聽候恩慶調度先宜剴切曉諭總以疏通道路無誤行程爲要該土司喇嘛如敢抗拒不遵再行調撥官兵以資彈壓未可遽示兵威以致激成事變將此由五百里各諭令知之○以紳團出力永廣湖北漢川縣文武學額各二名○壬辰諭內閣周天受奏浙江軍務將次完竣擬卽帶兵前往福建助剿等語署福建漳州鎮總兵周天受著加恩賞還提督銜卽著馳往福建與周天培饒廷選張騰蛟等分路進剿俟前任侍郎曾國藩到後

卽歸曾國藩調度○諭軍機大臣等前因張芾奏參周天受等帶兵有遷延滋擾各情當將該總兵革去提督銜毋庸總統浙江軍務諭和春何桂清確切查辦嗣據晏端書奏周天受被參各款傳聞異詞惟在金華湯溪實有兵民互鬪之事念其疊次收復各城降旨俟全浙肅清著和春據實保奏本日據該總兵奏添兵入閩助剿俟龍泉克復卽親督各軍進攻浦城此次周天受督兵著有勞績業經降旨賞還提督銜飭令帶兵援閩俟曾國藩到閩後歸該侍郎調度矣至張芾所參周天受前在全旺餘嶺等處是否疏於堵剿及誣殺金華鄉團於楊國正庸懦失機有無袒護竝田應科等在開化肆擾賊至卽潰各情仍著和春何桂清查明據實具奏毋稍容隱將此由六百里各諭令知之○癸巳諭內閣和春奏金陵水陸官軍連日攻擣賊營獲勝竝上游水師掃蕩逆壘情形



一摺金陵長圍築成賊匪情急思逞水營官軍先後在雙隴口等處江面擊沈來往賊船六隻奪獲二十餘隻斃賊無算賊復於壽德洲潛築營壘竝調集逆黨分守太平神策各門和春派總兵李若珠等會督水陸官兵竝進焚毀賊卡四座逆匪羣向下關遁去七月初八日賊眾大股欲撲長圍張國樑卽傳令南北各營分攻太平金川各門殲斃黃衣賊酋二名勢遂大潰其上游李德麟師船於六月十一日進剿泥汊河賊巢將逆壘二座木卡四座全行踏毀斬馘二百餘級生擒僞檢點等四十三名訊明正法逆賊經此次痛剿勢已窮蹙仍著和春督飭水陸鎮將迅速攻克盡殲醜類毋稍稽延○諭和春奏浙江軍務平定請旨可否毋庸赴浙等語浙江被陷郡縣見經周天受等督兵先後克復全境漸就肅清和春著毋庸前赴浙江總兵李定太前令幫辦和春軍務此時與

周天受等會勦竄聞各匪著統歸曾國藩調度曾國藩未到以前卽歸慶端調度○諭官文奏撫臣丁憂據情代奏竝以軍務緊要請照軍營例改爲署理各等語湖北巡撫胡林翼自邀簡任以來時閱四載於吏治兵事均能實力講求見雖閭境肅清而大軍水陸東下進止機宜尙待調度籌備餉精亦關緊要該撫見丁母憂著照軍營例穿孝百日加恩賞銀四百兩卽由湖北藩庫給發俾經理喪事所有湖北巡撫印務著官文暫行兼署胡林翼俟百日後仍著署理巡撫如扶柩回籍再行賞假兩箇月俟軍務完竣准其補行終制以遂其孝思○丙申勝保奏臣因李兆受投誠之事已有端倪派副將慶瑞等馳赴清流關相機酌辦旋據慶瑞稟稱該副將到滁州境內李兆受遣人迎請入城竝親身迎於道左祇候極恭入城後又屏去從人憑陳悔罪自新之意出於至誠慶瑞

亦卽曉以大義示以禍福李兆受矢志無他慶瑞卽於次日出城至清流關等候事關皖北全局深恐受降之際操縱少不得宜轉致又生枝節必須臣親自前往方可懾服其心因卽輕騎滅從連夜啟行於七月十一日抵清流關卽在關山以東數里之外紮立營盤派人傳李兆受來見李兆受果率其弟昭奎及其頭目朱元懋等十餘人跪迎道左臣坦白相示予以不疑宣布皇上聖恩寬大准其自新竝許以投誠後如果立功尙當從優奏獎李兆受感激涕零指天矢日以白其心復述賊中情形竝言此時無難卽行薙髮不再回滁止以手下人等有家屬者多必須安置得宜眾心固結方可爲異日報效地步此外頭目陳廣俊等二百餘人見在金陵亦須設法撤出免至舉事後致被髮逆戕害且滁城內尙有僞國宗楊姓爲賊耳目而髮逆李秀城大股復踞和州此賊兇

悍異常更宜用計剪除方免後患見在所部四萬餘人擬遣去大半酌畱精壯萬餘以備效用請緩至八月於廬江巢縣各賊收糧之後再遣心腹裏應外合便可次第收復作因糧於敵之計一面明示率眾薙髮先獻滁全二城再圖巢縣廬江和州無爲等處以贖罪而立功臣察其情詞似非虛誑惟既入我範圍當有以動其欣羨卽傳旨賞給花翎三品頂帶復傳見其弟昭奎及其黨朱元舉等分別予以五六品頂帶李兆受復率其弟跪請更名以明舊染維新之志臣擬請旨爲之更名世忠昭奎更名元忠仍令其率眾回滁約期舉事復派委員姜錫恩等同往城中竝畱慶瑞暫駐清流關飭塔思哈仍在關山照常防守知照會剿全滁各官兵此時仍毋疏懈俟獻城後再行撤防臣拜摺後卽日馳回紅心驛相度鳳臨懷遠緩急情形各飭極力攻剿隨時具奏 上諭軍機大

臣等本日據李孟羣奏賊匪圖撲廬州情形危急請催李續賓等迅速赴援旋據翁同書奏廬州兵潰賊匪入城各等語廬營將驕兵情實爲可恨已頒給勝保欽差大臣關防並令翁同書幫辦軍務以重事權翁同書由定遠前進不日當可抵廬著卽嚴飭各路兵勇力圖克復如有鎮將不遵約束兵勇輒行譁潰者卽行從嚴參劾按律重懲使咸知儆畏不至仍蹈故轍李續賓一軍據官文奏已行入皖境水陸東下但由潛太一路直攻安慶係沿江進剿恐其攻剿愈急賊愈北趨見已諭知官文令其知照都興阿李續賓酌分勁旅由舒桐一帶赴援廬州力扼賊匪北竄之路惟楚軍繞越需時卽勝保督兵懷遠亦未能剋日抵廬著翁同書咨商德興阿先行酌撥馬步官兵前往協剿俟勝保全軍到廬或楚軍趕到再行酌量撥回勝保在滁州招撫李兆受後仍擬回攻懷遠著

於布置停妥後俟袁甲三馳抵懷遠或已至鳳陽卽將三省會剿事宜交袁甲三督辦勝保卽進攻廬州不准避難就易惟袁甲三究係文員尙須武職得力大員幫辦竝著勝保袁甲三會同商定一員奏明請旨至李兆受納款投誠旣經勝保傳旨賞給頂翎但其舉事尙未定期若先行降旨泄漏事機恐未遂投誠先爲粵逆加害是以待其獻城舉事卽行破格獎賞勝保可將此意密諭知悉俾無疑貳至滁州城內旣有僞國宗楊逆盤踞何以任聽委員出入而李兆受出城迎降楊逆竟若罔聞究竟有無奸僞仍當隨時體察不可稍存大意李孟羣已革職畱營著卽飭令收拾潰兵力圖自效將此由六百里加緊各諭令知之○諭本日據李孟羣奏廬郡危急請飭楚軍改道援剿竝據翁同書奏行抵定遠據報廬州失守各一摺廬郡爲皖省腹地南北要衝舒桐聚匪尙以萬

計均圖窺伺廬郡既失恐大局不堪設想見在楚軍水陸馬步數萬悉由太湖安慶進攻賊必北竄著官文卽行知照李續賓都興阿等先其所急改道赴援廬州俾李孟羣亦得收集潰兵會圖克復兼扼賊匪北趨如或不能全數赴援亦當酌撥勁旅前往助攻毋稍延誤至沿江一帶亦關緊要楊載福師船尙在黃石磯駐紮亟盼李續賓等陸路馬步到後會擣蕪湖竝著官文知照李續賓等酌留兵勇會同廓清江面毋致顧此失彼將此由六百里加緊諭令知之○諭前因廬州需餉諭令何桂清等將前撥餉銀速行籌解本日據李孟羣奏饑軍數萬枵腹荷戈調遣不動情形萬分危殆竝據翁同龢奏稱廬州於本月十五日業已失守等語前撥皖北軍餉各省多未解到見值廬州失守攻剿機宜尤形喫緊未容以餉項支絀致滋貽誤所有前撥江蘇省按月解皖餉銀二萬

兩著何桂清按月如數撥解俾得源源接濟其前撥之山東省銀四五萬兩及河南省協款竝著崇恩瑛榮於各該省無論何款項下速卽如數措撥派委妥員解皖無再遲緩將此由六百里各諭令知之○命鑲黃旗蒙古都統勝保爲欽差大臣督辦安徽軍務安徽巡撫翁同書幫辦軍務太僕寺卿袁甲三督辦三省勦匪事宜○以廬州被賊竄陷革署巡撫李孟羣職畱營效力○丁酉諭內閣慶瑞奏建陽光澤二縣城先後克復竝順昌城圍已解一摺據稱江右逆匪復竄建陽本年六月間業經聯甲擊敗收復縣城圍攻順昌之賊亦經我軍屢次擊退保固危城斃匪五百餘名生擒二十餘名著該署督卽飭帶兵文武員弁將竄逃各匪迅速剿除以次收復政和等縣毋令蔓延○諭軍機大臣等慶端奏甯化失守請飭催調廣東援兵一摺前因王懿德等奏閩省軍情緊急



曾諭黃宗漢飭令壽山統帶兵勇二千名赴汀州一帶協剿已閱三月未據覆奏見在閩省延建邵等處賊氛日熾汀屬之甯化縣復於五月二十五日失陷本省無兵可撥著黃宗漢等仍飭該總兵帶兵二千名迅赴汀州若壽山一時未能出省卽著另派得力鎮將帶兵前往會同福建官兵迅圖克復甯化縣城毋稍延誤將此由六百里諭令知之○予河南陣亡知縣錢應昇等祭葬世職○庚子翁同書奏臣在定遠途次聞廬郡失陷潰兵潰勇均由梁園散走臣隨卽馳赴梁園沿途督令折回惟潰兵多係不持寸刃必須酌配兵仗臣查廬州失守之初三河之賊竄至二十里鋪副將余應彪督兵迎戰失利該逆卽以萬餘之眾直撲至十八里岡經副都統麟瑞等迎戰獲勝賊眾始略退數里旋復糾合大股二萬餘人直到十三里站橫亙至西路大蜀山紮賊營十餘座分路

直撲城垣蕭開甲在南門外接仗麟瑞在西門接仗逆眾數萬漫山徧野我軍勢不能支又見該逆另分二股突由西北繞抵廬城城外各軍首尾不能相顧紛紛驚潰蕭開甲馳馬衝殺被賊刺傷下馬麟瑞率馬隊左右馳突亦被賊傷冒圍而出知府伍成功趕往救援陷沒賊中麟瑞余成蛟等糾合餘眾退守店埠廬州城內本無官兵僅有署臬司馬新貽集團數百名出城接應與賊血戰多時各營敗兵多由北門小路潰往梁園該逆遂於七月十五日午刻入城十六日夜間賊匪數千進踞店埠臣一面收集潰兵一面催令李孟羣麟瑞堵剿竝飭署臬司馬新貽購辦米石以濟飢軍十七日營總富明阿擊賊於店埠之北殺賊六七十人賊始不敢前進仍退回店埠臣查廬城再陷固由賊眾兵單而諸將守禦不力亦難辭咎署總兵副將蕭開甲知府伍成功力戰捐軀大節

凜然應請旨交部從優議卹署合肥縣知縣王應奎尙無下落應俟查明辦理署臬司廬州府知府馬新貽督團出城禦賊倉卒失守致將臬司印及廬州府印一併遺失實有應得之咎惟念該員心地樸誠民情愛戴且一時更換乏人仰懇 天恩將該員革職暫行畱任以觀後效署巡撫李孟羣於艱難拮据之中慷慨誓師不辭勞瘁副都統麟瑞受傷力戰至今尙在前敵堵禦應請均免置議其餘各將領有無退縮畏葸之員容 臣再行細察見已飛咨勝保德興阿各撥馬隊助剿竝抽調附近兵勇力扼店埠北路以杜北竄 上諭內閣總兵蕭開甲知府伍成功當賊撲廬州城時帶兵迎剿因賊眾兵單先後陣亡實堪憫惻均著交部從優議卹署按察使廬州府知府馬新貽帶練出城遺失印信惟該員接應官兵與賊血戰多時且平日民情愛戴著革職暫行畱任副都統

麟瑞雖因力戰受傷究屬堵禦不力應得處分著勝保再行查覈具奏其餘帶兵各將領有無退縮畏葸情事並尙無下落之署合肥縣知縣王應奎一併查明分別奏請辦理○戊戌諭軍機大臣等德興阿奏浦營防剿喫緊請飭撥馬隊來營一摺見在金陵賊巢未克江北防剿喫緊德興阿軍營馬隊止一千七百餘名不敷分布自應酌量添調以資截剿此時天津防務較緩著價格林沁於所帶馬隊內挑選三四百名並著瑞麟托明阿於直隸提標內酌撥馬隊二百名馳赴德興阿軍營聽候調遣所請另撥馬二百五十匹卽由南苑捐輸馬內撥給俟價格林沁等所派馬隊官兵赴南苑領取帶往浦口可也將此諭令知之○己亥山東巡撫崇恩奏派沂州協副將郝上庠剿辦郟城等處幅匪得旨該匪叛逆昭然竝有許多火器若不認真剿捕淨盡殊爲可慮斷不准徂於

粉飾積習將就含混了事○改定湖北漕務章程一有漕州縣覈減向日浮收之數分別折價所有由單串票樣米差費等類概行革除一折收北漕照部定每石一兩三錢之數共正耗銀二十一萬四千餘兩竝津貼幫丁兌費銀六萬八千餘兩均解交糧道庫暫行提充軍餉一各州縣折解南糧每石酌定一兩五錢共應解銀二十萬六千五百餘兩除支發滿漢各營兵食外尙餘銀八九萬兩存畱藩庫備災緩撥補之用一漕南水腳及隨漕等項銀兩見因漕船停運均解交道庫報撥竝暫濟兵餉一糧道以下各官漕規及各衙門書吏雜費概行裁革一漕南折價民間輸將自易毋許各州縣稍有帶欠至將來運河修復仍設法辦解本色應令隨時體察情形覈辦從巡撫胡林翼請也○以捐輸軍餉永廣福建臺灣鄉試中額二名湖北三名四川五名臺灣府學額九名粵

籍二名彰化三名臺灣鳳山嘉義淡水各二名噶瑪蘭廳一名四川綿竹四名綿州三名德陽二名華陽漢江北定遠廣安岳池宜賓富順南谿萬遂甯中江蓬谿安岳蓬渠大竹眉邱瀘仁壽羅江各一名○庚子諭內閣前經選定萬年吉地於平安峪地方爲時已久自應擇吉興工著派怡親王載垣鄭親王端華大學士彭蘊章協辦大學士尙書柏葑尙書瑞麟全慶侍郎基溥敬謹辦理○諭御史朱文江奏楚省辦理善後宜嚴禁官役擾累一摺據稱楚省三遭兵燹民生凋敝異常小民展轉還鄉仍復流離失所甚至吏胥藉端勒索將民間屋宇地基拆毀霸占地方不加禁止復轉令民房繳契蓋印爲勒稅營私之計如果屬實大干法紀亟應嚴行禁止著官文通飭所屬凡民間產業概行給還如契約遺失查明補給如有官役勒索霸產情弊立即嚴參懲辦以示朕奠安災

黎之至意○諭軍機大臣等勝保奏粵逆竄踞廬州軍情緊急懇  
將前調馬隊迅賜催撥一摺本日已諭令僧格林沁飭催前往矣  
廬州軍營兵勇本不爲單乃賊至卽潰以致省城失陷是其平時  
漫無紀律已可概見本日復據翁同書奏謀報賊眾數萬欲撲梁  
園店埠亦爲賊踞逆勢猖獗已極急應設法堵剿勝保屢次奏報  
總以事權不一爲詞昨已授爲欽差大臣督辦安徽全省軍務所  
有皖境各軍均歸節制勝保膺茲重任責無旁貸前諭俟袁甲三  
馳抵懷遠或至鳳陽後勝保卽進攻廬州著飛咨袁甲三迅速前  
進接辦三省會剿事宜該大臣亦卽調撥兵勇分路布置毋令蔓  
延北犯勝保兵勇未到以前翁同書仍遵前旨咨令李續賓迅派  
兵勇由舒桐一帶赴援並咨商德興阿先撥馬步官兵赴皖協剿  
毋致延誤至李孟羣業經革職畱營著勝保翁同書責令該革員

奮力攻剿以贖前愆其所帶之勇既係無業游民不能得力著卽認真裁汰若慮遣散後盡歸於賊試思此等烏合之眾不難卽時擊散若畱於軍營必致得力兵勇爲其牽累著勝保翁同書力加整頓分別撤畱以節糜費將此由六百里各諭令知之○諭勝保奏皖省軍情喫緊請催馬隊官兵前往助剿一摺見在安徽廬州失守皖北軍情萬分緊急必須添調馬隊以資攻剿著僧格林沁遵照前後諭旨迅卽派往並多備餘馬交該官兵帶往毋稍遲誤將此諭令知之○諭翁同書奏亟需幹員妥辦糧臺請飭何桂清派員前往等語此次廬郡失守店埠亦已被陷廬營及附近各營兵勇俱已潰散見授勝保爲欽差大臣翁同書幫辦軍務並飭部撥餉以充兵食該省署藩司張光第據該撫奏稱並無應變治劇之才自應另派大員前往經理著何桂清卽於江蘇司道中遴派



明幹之員迅卽前往廬州總理糧臺事務以專責成將此由五百里諭令知之○諭胡興仁奏馳抵浙江辦理堵剿一摺見在浙江軍務漸就肅清閩省賊勢蔓延已諭曾國藩以援浙之師由江西鉛山直擣崇安相機追剿胡興仁業經補授巡撫地方是其專責著毋庸會辦曾國藩軍務該撫惟當力求整頓於收復各郡縣善後事宜妥爲布置竝調兵籌餉援剿閩疆毋負委任將此由五百里諭令知之○命晏端書來京以胡興仁爲浙江巡撫調林揚祖爲甘肅布政使以慶廉爲陝西布政使前浙江布政使○予安徽陣亡總兵官蕭開甲等祭葬世職○予河南被戕知縣保涇祭葬世職建祠○壬寅以浙江全境肅清賞候補三品京堂張芾花翎總兵官周天培提督銜餘升敘有差○是月緩徵山東德平等六縣竝東昌衛被風被雹被旱被坍莊屯新舊額賦免喀什噶爾被擾屯戶

同戶未完新舊額賦並升科糧石